

Jesusa Akatramurí Yusa Wakaníjiai TÚRAMU

Yusa Wakanín nákasarmiania nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuitiampramiaj nunasha áatramiajme. Yámankamtaiknumia,

² nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmarijiai túratniua nuna ni akatramurín jintintiawarmiaiyi. ³ Tura jaka nantaki, Jesus tímiajaik wantintiukmiaiyi ni akatramurín. Tura kuarenta (40) tsawant nin wantintiukarmiaiyi. Nuna tura nekas iwiaakjai tusa iniakmasmiaiyi, nekaawarat tusa. Tura Yusa akupeamurí urukukit nuna mash ujakmiaiyi.

⁴ Jesuska ni akatramuríjiai tuke pujus, nin chicharuk “Jerusarénumia wéerap, tímiaiyi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaiyi.

⁵ Tuke enentáimsatarum. Juan entsajai atumí ayashín imiatmimiarme. Túrashá wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantín áintsankete” tímiaiyi.

Jesus nayaimpiniam wakamiania nu

⁶ Tura Jesusjaj irunar matsamas anintriarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiayi. ⁷ Jesus áimiuk tímiayi “Winia Apar túrattana nu warí tsawantinik túrunatí nu nekaat-niusha atumniachuiti. Apar Nínki neka asa ni kakarmarijiaín túrattawai. ⁸ Tura atumsha Yusa Wakaní kakarmarín sunastatrume. Nii taa enkemprutmamtai kakaram ajasrum, Wíi túramu etserkattarme. Emka juí Jerusaréñ péprunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiayi Jesus.

⁹ Nuyá chichas amir, ashí ni akatramurí ii wajainiaí, Jesus nayaimpinmaani junakmiayi. Wéa-wéakui yurankim mash Nin amuámiayi. Tuma asamtai ni akatramurí Nin wáinkiacharmiayi. ¹⁰ Tura Jesus waakkui ni akatramurísha yakí ii wajainiaí, jimiara áishman puju entsaru nui wantintiukarmiayi. Tura ayamach wajattsarmiayi. ¹¹ Nu áishmansha Jesusa akatramurín tiarmiayi “Kariréanmaya áishmanka, ¿urukamtai nayaimpinmaani imiá íimprum? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

Matíasan anaikiarmiania nu

¹² Tuasua amikmatai Jesusa akatramurí Uriwiu náinniumia akaikar Jerusaréñnum waketkiarmiayi. Uriwiu naincha Jerusaréñnumsha tíjiuchiiti, chikichík kirumitrua núnisan. ¹³ Tura Jerusaréñnum jeawarmiayi. Nui jeawar, jeá wayawar yakí wákararmiayi. Nui Pítrusha,

Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachi Jútassha, tímian wayawarmiayi. ¹⁴ Jusha mash tuke iruniarmiayi Jesusa yachijiai. Tura Jesusa nukurí Marijiai, nuyá chíkich nuwajaisha tuke iruniarmiayi, Yus áujstai tusar. ¹⁵ Nuí siántu painti (120) aents iruntrarmia nuí Pítiur chichastaj tusa wajakmiayi.

¹⁶ Pítiur juna tímiayi “Yatsurtírmesha, umarutírmesha antuktaram. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakanj jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. ¹⁷ Nú Jutaska ii írutramuitiat, ii takaamurin páchitkiaitiat, ¹⁸ tunáa tura nujai kuítian achik nunkan sumakmiayi. Tura piniakum iniaañ tantane páttimiayi. ¹⁹ Tuma asamtai ashí Jerusarénum pujuarmia nu, nuna nekaawar nú nunkan “Numpa Nunka” anaikiarmiayi. ²⁰ Kame Sarmu papinium Tawitkia juna áarchamkia: “Ni jeesha itiarak atí.

Nu jeanmanka penké pujuschartí.” Tura

“Ni takatři chíkich atankiti.”

Tu aarmaiti’ tímiayi.

²¹ ‘Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijiai pujumia nuí tuke Nin nemarsamia nu atí. ²² Juan Jesusan imiaimiania nú tsawantnumia jukí, Jesus

nayaimpiniam wémiania nú tsawantan tímianu ejé tuke Niijjai wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiarí etserkamí tusar túramí” tímiayi Pítiur.

²³ Tura nuyá jimiará shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naari Parsapas, tura apach náarinkia Justu, nunasha anaikiarmiayi.

²⁴⁻²⁵ Tura nuyá Yus-shuar Yúsan áujainiak juna tiarmiayi “Ii Uuntri, Amesha ashí shuara enentái nékame. Jui awai jimiará áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatri achikiat tusam, ¿tuá achikium, Uunta? Paant iniakmasta.” Tu augsarmiayi.

²⁶ Tura Israer-shuara túrutairi núnisar, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakaní taramiania nu

¹ Pintikiustís náartin jísat jeamtai, chikichik jeanman nuin Yus-shuar tuakarmiayi. ² Tumai aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi. ³ Tura nuí pujuiniái ji wajaí kea áaniun wáinkarmiayi. Túruna ankant ankant puunak tarurarmiayi. ⁴ Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairi

súsarmiayi. Tuma asamtai nujai niisha chíkich chichaman chichasarmiayi.

⁵ Nui Jerusarénum Yus táman umirin Israeraents ármiai. Ashí nunkanmaya Jerusarénum taar matsarmiai. ⁶ Tura túrunamia nuna

antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi.

⁷ Nekaachar ashamkarmiayi. “Warinkit, tunaim ajarmai. Ju aents chíkich chíkich chichaman chichainia nu, ashí Kariréanmayanchukait, tiarmiayi. ⁸ Tura iisha ankant ankant ii

chichameñka ántatsjik. Ausha urukainiakua, nunak chichainiawa, tiarmiayi. ⁹ Jui ashí

nunkanmaya aents pujuiniatsjik. Partianmaya, Eramnumiasha, Misiuputamianmayasha, Puntanmayasha, tura Asia nunkanmayasha,

¹⁰ Príjianmayasha, Pampirianmayasha, Ejiptunmaya tura Áprikianmaya Serinia nú nankaamasnumiasha pujuiniatsjik, tiarmiayi.

Nuyasha ii shuarsha Ruma péprunmaya yaunchu taar jui matsatainiawai. Chikichcha tuke Israershuar áiniawai. Tura chikichcha Israershuar ajastaj tusa Israer túrutairin mash túruiniawai.

¹¹ Kritianmayasha Arapianmaya pujuinijai. Tura ashí mash ii chichamejaisha Yusa péñker túramuri ántaji” tiarmiayi.

¹² Ashí aents nuna nékachu ásar ashamkarmiayi. Tura nuámtak aniniaisarmiayi “¿Warinminiait ju?”

¹³ Tura chikichcha wishikiarmiayi. “Nampeku áiniatsuash” tiarmiayi.

Pítiur ujakmia nu

14 Nuĩkia Pítiur, chíkich áuntse Jesusa akatramurĩjiaĩ wajaki, kakantar chichasmiayi. Chichaak tímiayi “Jutíanmaya shuartiram, Jerusarénnumiátirmesha antuktarum. Wi

títiatjana nu antukrum péñker enentáimpratarum. 15 Ju áishman, nampekarai, tárugna nu, nampekcharai. Warí, nantu imiá ishichik takuni. ¿Aisha itiurak? 16 Antsu Yúsna etserin, ni naari Juér, yaunchu áarmia nu, yamá túrunayi, tímiayi.

17 Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariartatui. Tura nátsaka ímariartatui. Tura uuntka mesekrimariartatui. 18 Tura áishmansha

nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariartatui.

19 Yaki nayaimpiniam, aents túrachminian iniakmariatjai. Tura nunkanmasha

winia kakarmarun iniakmariat tusan numpancha, jiniasha, mukuintiuncha yuranmia áintsan akupkattajai. 20 Tura

tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiejna nu jeatsain, túrunattawai. Nú tsawantcha imiá nekas uunt átatui. 21 Nuĩkia ashí shuar

nekas winia kakarmarun seana nuka uwemprariatui” tímiayi Yus.”

Núnis Juér áarmiayi’ tímiayi Pítiur.

22 Tuke chichaak: ‘Israernumiá shuartiram, wi

títijatjana nu antuktarum. Nasarénumia Jesusnan tajai. Nú Jesusan Yus shiir enentáimtaiwai. Yuska, átum ti enentáimprarum ni kakarmarín paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiai, átum íimmianum. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai. ²⁵ Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamu áchattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmetjai, Tunaarincha. Túmaitkui anentu asam ayashur káurtin tsankatruckhattame.

²⁸ Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

²⁹ Pítiur tuke chichaak: 'Páantchakait. Ii uuntri Tawit yaunchu jákaiti. Tura iwiarsamuiti. Ni iwiarsamuri iini pujatsuk. ³⁰ Túrasha Tawitkia Yúsnan etserniuyayi. Tuma asa Yus tímia nuna

nekaamiayi. Yus Tawitian chicharuk tímiayi “Ame akupniuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan.” Nuna Yus táman Tawit nekaamiayi. ³¹ Neka asa, túruntsain Tawit, wainkia nútiksan, Kristu nantaktintrin áarmiayi. Kristu túrunatniurin chicharuk tímiayi “ni wakanincha jákatniunam ikiukchatniuyi. Ayashincha káurtinian tsankatkashtiniuyi.” ³² Au Krístun tímia nu Jesusaiti. Nu Jesusnak Yus iniantkimiai. Nuka iisha neka asar étsereaji. ³³ Yuska, Jesus nankaamantuiti tusa ni untsuuruin apujsaiti. Tura ni Wakanin Jesusan súsaiti, Nii yaunchu tímia nútiksan. Tuma asamtai jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

“Uunt Yus winia Úuntrun tímiayi “akupin pujutainium, winia untsuuruin pujustá.

³⁵ Ame nemasrumin nupetkattajai. Nu túruntsain jui pujustá’ tímiayi.”

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrusha Jessusha in uwemtikkiartin Krístuiti. Ashí áentstíram nu péñker nekaatarum” tímiayi Pítíur.

³⁷ Nuna antukar wake mesekarmiayi. Tura Pitruncha chikich akatramuncha aniasarmiayi “Yatsuru, ¿nuinkia itiurkatjik?” tiarmiayi. ³⁸ Tutai Pítrusha chichaak “Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuinkia atumí tunaarin Yus

tsaṅkurtamprattarme. Túrunawakrumin Yuska ni Wakanin suramsattarme, tímiayi. ³⁹ Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai” tímiayi.

⁴⁰ Nú chichamjai tura nuyasha Pítiur tuke jintintiu tímiayi “Yajauch shuara asutiátniuri átatna nuyá uwempratarum” tímiayi. ⁴¹ Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi. ⁴² Ashí nu shuar Jesusa akatramuri jintintiarmla nuna tímiatrusaṅ antukarmiayi. Tura irunar shiir enentáimtunaisar yurumin ármiai. Túrawar, Kristu enentáimtustin namperin najanin ármiai. Túrawar Yúsan áujiarmiayi.

Yus-shuar pampararmiania nu

⁴³ Tura Yuska aentsti túrachminian Jesusa akatramurijiai túramiai ni kakarmarin iniakmastaj tusa. Tuma asamtai ashí aents nuna wáinkiar ashamkarmiayi. ⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmaríncha surukar, atsumainia nuna súarmiayi. ⁴⁶ Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin ármiai. Tura nankaamantu enentáimtumatsuk, yurumkan ajamnainiarmiayi. ⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant

shuaran uwemtikiar Yus-shuar írunmanum íkiaun̄ki wémiayi.

3

Wekaicha wekasamiania nu

¹ Chíkich tsawantaj, nantu nun̄kaach ajasmatai, Pítiur Juan̄jai, Yusa Uunt Jeen Yus áuj̄satai tusar wearmiayi, Israer-shuar tuke turin armia nútiksaran. ² Tura áishman, ni akiiniamurinīa wekaicha amia nu, nuī aa wáitiniam tuke tsawant pujumiayi. Nu áishman̄nasha ni shuarī entsakí júkiar nú wáitiniam apujin ármiayi, nuī shuar wayan kuítian seat tusar. Nú wáitisha, Shiir Waiti, tutaiyayi. ³ Tura nú shutuapsha Pitrun Juan̄jai wayan wáinkiamiayi. Wáiniak kuítian seamiai. ⁴ Tura Pítiur Juan̄jai apajas ísarmiayi. Tura nú áishman̄nasha chicharuk “íirsata” tímiayi. ⁵ Aishman̄sha, surustatuapi, tu enentáimias, íimsamiayi. ⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjai nan̄kaamas takakjana nuna amastajai. Wats, Nasarétnumīa Jesukrístu kakarmarijiāi wajakim wekasata” tímiayi.

⁷ Tinia iniais, Pítiur ni untsuurinī achik awajkimiayi. Túram ni nawesha, wanus̄esha kakaram ajasmiai. ⁸ Tura niisha wajaki nantent ajakmiayi. Nuyasha wekasamiayi. Tura Pítruj̄aisha Juán̄jaisha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkiarmai. Tura ni chichamen anturkarmiayi. ¹⁰ Tura chichainiak “Nuik Yusa Uunt Jeen wáitirin, Shiir Waiti tutainium, nu

áishman̄ tuke pujuuya núchakait” tiarmiayi. Tura ni túrunamur̄in nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka pēnker ajasu asa Pítrujai Juánjaisha penké tsurachmiayi. Tura aents nūi pujuarmia nu, warinkit tusar, jeáshkirī tsékenki wearmiayi. Nuka Sarumúnna tiniu áarmiayi.

¹² Aents káunkarun Pítiur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿lisha pēnker asarikī tsuarmaji? ¿li kakarmarijiāinkik̄ ewekamsamaji?

¹³ Atsá. Antsu Yuska ni Ūchir̄in Jesusan ashí nan̄kaamantu awajsaiti. Ii uuntrī Apraamsha, Isaksha tura Jakupsha enentáimtin̄ armia nú Yusan tajai. Átumka Jesus nakitrarum kapitián Piratuí surukmarme. Tura Piratu akupkataj tau atumsha suritkiamarme. ¹⁴ Jesus pēnker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. ¹⁵ Túrarum iwiaaku átinian Amaana nu maamarme. Tuma ain̄ Yuska Nin jakamunmayā iniantkimiayi. Nuka iisha neka asar étseareaji. ¹⁶ Tura jū aishman̄ jūi wajaana jū tura nékarmena jū, Yusa Uchirī naarī enentáimta asa kakaram ajasuiti. Jesus enentáimtususu asa nekas pēnker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úuntrījiāi Jesusan túramarmena nu nékatsuk túramarme. ¹⁸ Tura nu túramurmijiāi Yus yaunchu tímia nu tímianak umikiurme. Ni Krísturī

wáitsatniuya nuna Yuska ashí ni etserniurín áamtikramiayi. ¹⁹⁻²⁰ Wats, yamaikia tunaaruminia kanaktiarum. Túrarum Yúsnumaani ayantártarum, tunaarun asakárat tusarum. Túrunawakrumniñkia, atumin uwemtikramprarat tusa Yus yaunchu anaikiamia nuna akupturmaktatrume. Nusha Jesukristuiti. Tura Niiñiai enentáimin ayampratin átatui. ²¹ Tura yamaikia Jesukristu nayaimpiniam pujustiniaiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiayi. ²² Tuma asa Muisais ii aparín tímiayi:

“Atumi Uunt Yusri ukunam etserniun akupturmaktatrume, winia akuptukmia núnisan. Nuámtaktirminia achik akupturmaktatrume. Tura nii títiatna nu umirkatarum” tímiayi. ²³ Nánkamas aents nu etserniun chichamen umíachkunka emesnartatui. Tura Israer-shuarnum páchitkia áchattawai.

Núnisan áarmiayi Muisaisha’ tímiayi.

²⁴ Pítiur tuke chichaak ‘ímiata, Yúsnan etserin Samuer ju tsawantin túratniuri etserkamiayi. Nuyá ashí Yúsnan etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum péñker pujustinian Yuska ii uuntri Apráaman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úuntrin tímia núnaka incha túramji, tímiayi. ²⁶ Iimiata, Yus ni Uchirín iniantkimia nui, atumin

emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítur.

4

Pitruncha Juánnasha kajerkarmiania nu

¹⁻² Pítrusha Juanjái Yusa chichamen áentsun jintintiniak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniaí Israer-patri táarmiayi. Tura Yusa Uunt Jeen wainniu úuntrisha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiari chichaman jintintinia asamtai. ³ Yamaikia kíawai, kashin iismí tusar achik sepunam enkea iniaisarmiayi. ⁴ Tura Pitrun nuik anturkarmia nú aents untsurí Yus-shuar ajasarmiayi. Nuik Yus-shuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áarmiayi.

⁵ Kashin tsawarmatai Israer-shuara akupniuri, ni úuntrisha, tura ni jintinniurisha Jerusarénum iruntrarmiayi. ⁶ Nuisha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitíantri shuarisha tímian iruntrarmiayi. ⁷ Iruntrar Pitruncha Juánnasha utitiarum tusar akupkarmiayi. Tura itiarmatai, ajapén awajsarmiayi. Tura aniasarmiayi “Kame ýana kakarmarijái, yana chichamejai túrarum?” tiarmiayi. ⁸ Tutai nuyá Pítur, ni enentáin Yusa

Wakaní pimiutkamu asa tímiayi “Akupniutiram, tura úuntirmesha antuktarum. ⁹ Ju áishman nuik shutuap amia nu péñker ajasmari anintrarme. Kame itiurak péñker ajasuit táturmek. ¹⁰ Urukamtia úuktataj. Anintrakrumin iisha paant títiatji, Israernumia shuar ashí nekaawarat tusar. Ju áishman Jesukrístu kakarmarijiaj péñker ajasuiti. Nasarétnumia Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi. ¹¹ Nú Jesuska kayaa áintsan̄kete. Atumsha jeamniutiram, nú kaya yajauchiiti, tímiarme Jesusna. Túrasha túramaitiatan̄ Niisha jeanam emka apujsamua núnisan̄ ajasuiti, tímiayi. ¹² Tura chíkichjaj uwempratin pen̄ké atsawai. Ju nun̄kanam ii chikicha naari pachisar uwempratin atsaji. Jesuskete ii uwemtikrampratniun Yus suramsamij nu” tímiayi Pítiur.

¹³ Pítrusha Juansha nán̄kamas shuara áintsan̄ ármiai. Núkap unuimiarcharu ármiai. Tura unuimiarchaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, jusha Jesusa nemarin ármia núiti tiar nekaawarmiayi. ¹⁴ Nuyasha áishman péñker ajasmia nu niijiaj nui wajamiayi. Tuma asamtai, niisha aj̄i wajakui, Israer-shuara úuntrin̄kia, péñker ajaschaiti títai tukamá tujinkiarmai. ¹⁵ Tuma ásar, iik nuamtak áujmatsatai tusar, Pítrusha Juansha shutuapsha āa awemartai, tiarmiayi. ¹⁶ Tura áujmatainiak tiarmiayi “Ju Pítrusha ju Juansha itiurkatjik. Ju uunt túrunamun Jerusaré̄num matsatainia nu

ashí nékainiatsuk. Wáitaiiti titin tujintiaji, tiarmi-
ayi. ¹⁷ Tura, ashí aents nekaawarain̄ tusar yamaik
jiaktai. “Jū Jesusa naarī pachisrum penké jintinti-
awarairap,” titiai” tiarmiayi.

¹⁸ Tura árusan̄ Pitruncha Juánnasha
shutuapnasha ataksha untukarmiayi. Tura
chicharkarmiayi. “Jesusa naarī penké
áujmatsairap. Tura Jesusa túramurī penké
jintintiairap” tiarmiayi. ¹⁹ Tutai Pítiur Juanjaī
áimkiarmiayi “Enentáimpratarum. ¿Yus warinia
wakera? ¿Iikia Yus umirtsuk atumí chichamen̄
umirkatniukaitiaji? tiarmiayi. ²⁰ Nekaatarum.
Iisha íisjinia nu, tura antukjinia nusha ii etsertsuk
pujustin tujintiaji.” Tu áimkiarmiayi.

²¹⁻²² Shutuáp penker ajasmia nu kuarenta (40)
uwí nan̄kaamas takakuyayi. Ni penker ajasmarin̄
aents nekaawar, “juka aentsti túrachminiaitji”
tutar Yusa naarin̄ uunt awajsarmiayi. Tuma
asamtai aentsu uuntrī Pitruncha, Juánnasha
asutiátai tukamá aentsun ashamainiak áyatik
chicharkar iniaisarmiayi.

Yus-shuar Yusa kakarmarin̄ seawarmiania nu

²³ Pítiur Juanjaī an̄kant ajaras ni írutramuriin̄
waketkiarmiayi. Tura jeawar Israer-patri
uuntrī tura aentsu úuntrisha nin tiarmia nuna
mash etserkarmiayi. ²⁴ Nu ujakam antukar
métekrak Yúsan áujuk tiarmiayi “Winia Uunt Yusu,
Amesha nayaimpisha nun̄kasha najanaitme.
Nayaantsasha tura juí írunna nusha najanamiamē,
tiarmiayi. ²⁵ Tura Tawit ámin umirtamin amia nu
jū áamtikramiamē:

“¿Urukamtai ashí nun_{kan}maya aents charaatum ajainia? ¿Tura Israer-shuarsha urukamtai ántar chichaman enentáimiainia?

²⁶ Uunt kapitíán ármia nuka chichaman jurusarmi-ayi Uunt Yúsan.

Tura pepru úuntrísha iruntrar Uunt Yúsan kakerkarmiyi. Ni anaikiamurín Krístun nútíksan kakerkarmiyi.”

²⁷ Tu áarmaiti, Uunta, tura nekasaiti. Erutis apachi kapitíántrí Punsíu Piratujai jú péprunam iruntrararmiyi. Niisha yajaya shuarjai tura Israernumia shuaraim nuim iruntrararmiyi. Ame Uchirmin Jesusan tunaarínchan kakerkarmiyi. Jesuska Ame anaikiamíame, winia takatrun túrat tusam. ²⁸ Tura ame enentáimjai iwiaramamna nu uminkiatniuiti. Tura apachcha Jesusan kajerainia ásar, Ame iwiaramamna tímianak umikiarmiyi. ²⁹ Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta. ³⁰ Tura ame kakarmarmijiai jaasha tsuártin amasta. Ame Uchiram Jesus tunaaríncha nujai ii aentsti túrachmin túratniusha amasta. Aents Yusa kakarmarín nekaawarat tusam túrata” tiarmiyi.

³¹ Tura Yúsan tú áujas umíkmatai nuín irunar pujuiniain úurkamiayi. Túrunamtai ashí shuara enentáin Yusa Wakaní pimiutkarmiyi. Túmaitkiui ashamtsuk Yusa chichamen etserkarmiyi.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku

armia nuna, aya wíniakete tútsuk, jusha ashí iiniu ainiawai, tiarmiayi.

³³ Tura Jesusa akatramurisha, Yus ti yayamu ásar, Yusa kakarmaríjiai Uunt Jesusa nantakmiarín tuke etseras pujuarmiayi. ³⁴ Tura ashí Yus-shuarka nunkan takakusha jean takaku armia nusha, núnaka surukar kuítian itiarmiayi. ³⁵ Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. ³⁶ Chikichík shuar, ni naari Jusé, nunkan takakuyayi. Jesusa akatramurisha Jusén chíkich náarín apujtusarmiayi, Pirnapín. Nu náarisha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi. ³⁷ Niisha ni nunken surukmiayi. Tura nu kuítian itia Jesusa akatramurín súarmiayi.

5

Ananías tunaari

¹ Tura chíkich áishman, ni naari Ananías, ni nuwé Sapirjai ni nunken surukarmiayi. ² Niisha nunkan suruk kuítian emeenak akanak jukí Jesusa akatramurín werí takamtsukea nútikias susamiayi. Ni nuwésha, Sapir, nuna túran nekaamiayi. ³ Túramtai Pítiur chichaak “Ananías, ¿urukamtai uunt iwianch enentáimin enkemturmtai, Yusa Wakanín anañkataj tusam nunka surukam kuit achikiumna nu akankam ikiurmasam? tímiayi. ⁴ Entá, nuñkia nunka áminiuchukait. Surukumna nu kuitcha áminiuchukait. Nusha, ¿urukataj

tusamea tu enentaímp^{ram}? Amesha aya áentsnum wáitruach^{ume}. Antsu Yusnumsha wáitruame” tímiayi Pítiur. ⁵ Tutai Ananíasa nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishman^u tariar Ananíasa jakan penuararmiayi. Túrawar iwiarsatai tusar júkiarmiayi.

⁷ Tura Ananíasa nuw^e arur, menaintiú ura nan^{ka}amasai^u támiayi. Túrasha ni áishri^u jakanka nekaachmiayi. ⁸ Támatai Pítiur nuwan^u tímiayi “Turuttia. Átum nun^{ka} surukurmena nui, ¿kuit itiarumna núnikik surukuram?” tímiayi. Tutai nuwa^u tímiayi “Ee, núnik surukji.” ⁹ Tutai Pítiur tímiayi “¿Urukamtai atumsha Uunt Yusa Wakaní^u nekapkamsatai tusarum imiá enentáímp^{ram}urum? Pai, iisiá. Ame áishrumin iwiarsatai tusar júk^{ia}ria nu wininiawai. Tura yamaikia amincha juramkiartatui” tímiayi. ¹⁰ Tutai nu chichamaik niisha imia Pitru wajamunam jaka iniaantmiayi. Aishman^u wayaj tukamá^u jaka tepan wáinkiar^{mi}ayi. Túramtai júk^{ia}r ni áishrinin^u ayamach iwiarsarmiayi. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmarijiai túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirin^u irunin ár^{mi}ayi. Nu shikirisha, Sarumún^{na}, tu anaikiamuiti. Tura chíkichmamtinkia nuim iruntratniun^u ashamiarmiayi. Túmainiayatan^u, ti péⁿker áiniawai, tu wear^{mi}ayi. Tura Yus-shuar Yusa kakarmarin^u iniakmasarmiayi. Túra asamtai imiá untsurí^u

aents Yus-shuar ajasarmiayi. ¹⁵ Tura chíkich aents ni shuari jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakaninsha enkemprutmawainti tusar nu shuar túrawarmiayi. ¹⁶ Núnisan arantiá shuarsha ti untsurí ni shuari jáinian tura iwianchrukuncha nui Jerusarénum itiarmiayi. Tura ashí nui táaruka tsuámararmiayi.

¹⁷ Israer-patri uuntri, tura Satuséu aencha ni-ijjai pujuarmia nu suiir iiniak ¹⁸ Jesusa akatramurín achikiar enkeawarmiayi. ¹⁹ Túrasha kashi Uunt Yusa suntari nayaimpinmaya tara sepú wáitirín uraimiayi. Tura Jesusa akatramurín aa jíikiarmiayi. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurí sepunmaya itiatarum tusar.

²² Tura suntarsha sepunam jeariar Jesusa akatramurín wáinkiacharmiai. Atsawai tukam táarmiayi. ²³ Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jeen wain-niu úuntrisha, nu chichaman antukar, “tsej ausha ǵurutiak nunasha iniaisarat?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

²⁶ Túrunamtai Yusa Uunt Jeen wainniu uuntri ni suntarjijai wear achik itiar*miayi*. Túrasha penké aents kayajai tukurmaraj tusar, yajauch awajtsuk itiar*miayi*. ²⁷ Tura achik itiaar Israer-shuar naamka pujamunam naka awajsarmiai. ²⁸ Tura Israer-patri uuntri tímiayi “Iisha atumín chicháa chicharu awajsar, Jesusa naari pachisrum etserkairap tusar akupkachmakajrum. Túrasha, ǵan-tukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurijjai chichainiak “Iikia aentsjainkia iniankasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusri Nin iniantkimiayi. ³¹ Yus ni kakarmarijjai Nin nankaamantu awajsamiayi. Tura nekas Akupniuiti tusa ni untsuurini apujsamiayi. Tura áentsun Uwemtikniuiti. Israer-shuar enentái yapajiáwar tunaariniá uwemprarat tusa Yus túraiti. ³² Nu tuma asamtai iisha nu nekaar étserējai. Tura Yusa Wakanisha nuna étserēawai. Túrasha aya Yusa umirkarua nunak ni Wakanin súsaruiti” tímiayi Pítiur.

³³ Tutai nuna antukar ti kajerkarmiayi. Túrawar, maatai tusar wakeriarmiayi. ³⁴ Tura

nui Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Ju áishman aa ishichik wajasarti” tímiayi. ³⁵ Nuyásha irunar matsamarmia nuna chicharuk “Israer shuartiram, ju áishman tú túratai tu enentáimsarumna nu aneartarum. ³⁶ Enentáimsatarum. Nuik áishman Tiútas wantinkiachmakia. Niisha kapitániitjai takui, kuatru siántu (400) shuar nemarkarmiai. Tura ukunam nin maawarmatai, ni némarkamurisha pisararmiai. Túrunawar nuní amuukamiayi. ³⁷ Ukunmasha, iruntrar nekapmartin tsawantinha Kariréanmaya Jútas wantinkiachmaka. Tura nincha nútiksan ti untsurí nemarkarmiai. Túman máawarmiai. Nu túrunamtai nútiksan ni némarkamurisha pisararmiai. ³⁸ Jes, tuma asantai nu áishman aa wajainia nu iniaisatarum. Auka pachisairap. Au tumainia nu aya áentsnaketkuinkia amuukattawai. ³⁹ Tura antsu Yúsnaikkuinkia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

⁴⁰ Tú tutai tímianak umikiarmiai. Túrasha Jesusa akatramurín untsukar asutiáwarmiai. Tura chicharuk “Jesusa naari pachisrum penké ishichkisha etserkairap” tiarmiai. Tú tiar akupkarmiai. ⁴¹ Jesusa akatramurisha Israer-shuara uuntri pujamunmaya jíinkarmiai. Tura wáitsamniaitrume tusa Yuska Jesusa naari pachia asakrin ii natsantin wáitsatniun

tsaṅkatramkaitji tusar ti shiir enentáimsar wearmiayi. ⁴² Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawenkar áarmiayi. Tura tuke tsawant yurumak súsatin áarmiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nuṭi atumí waje ti nukap súarme. Tura íniuka ishichik súarme” tiarmiayi. ² Túruinia Jesusa tuse akatramurṭi ashí Yus-shuaran irurar tiarmiayi “Iisha Yus-Chicham etserkatin iniaisar yurumak súsachminiaitji. ³ Tuma asamtai yatsurtiram, atumṭiniṭi siati áishman eáktárum yurumkan súarat tusarum. Pénker wekainia nu, tura neka shuar, Yusa Wakanṭi pimiutkamu ainia nu achiktaram. ⁴ Iikia antsu Yus áujkir unuiniakratkir Yusa chichame etserkir wétatji” tiarmiayi. ⁵ Akatramu tiarmia nuna ashí aents enentáimsar pujuarmiayi. Túmainiak Estepaṅkan anaikiarmiayi. Estepaṅsha Yúsan tuke enentáimtiniuyayi. Tura Yusa Wakanṭisha pimiutkamuyayi. Chíkich áishmanṅkan anaikiarmiayi, niisha Jiripi, tura nuyá Purukuru, Nikianúrsha, nuyá Temuṅ, Parmenassha, Nikiurássha. Nikiurássha Antiukía nuṅkanmayaitiat Israernancha ashí umirniuyayi.

⁶ Tura nu siati áishmaṅkan Jesusa akatramurṅ itiararmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi. ⁷ Túrasha Yusa chichamenka tuke pampanḱi wémiayi. Nui Jerusaréṅnumsha Yus-shuar ti kawenḱarmiayi. Tura imia Israer-patrisha untsurḱ Yus-Chichaman umiriarmiayi.

Estepaṅkan Israer-shuara uuntriṅ júkiarmiania nu

⁸ Estepaṅsha Yusa waitnenkartutairḱ pimiutkamuyayi. Tura Yusa kakarmariṅsha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarṅ nekaawarat tusa túramiayi. ⁹ Israer-shuar iruntai jea, ni naari Anḱantin, ámiayi. Nuyá áishmaṅsha tura Serini nunḱanmayá áishmaṅsha, tura chíkich nunḱa Arijiantriṅmayásha, Serisianmayásha, Ásianmayásha, tímian Estepaṅjai áujmatsatai tusar káutkarmiayi. ¹⁰ Estepaṅ Yusa Wakanḱ nekatairijiai tímianak chicháa asamtai, nu áishmaṅ Estepaṅjai inḱiunaikiar nupetkataj tukamá tujinkiararmiayi. ¹¹ Tuma asamtai suiir enentáimtuiniak chíkich áentsun Estepaṅkan tsanumprurarar tusar eákararmiayi. Estepaṅ Muisaisnasha Yúsnasha yajauch áujmatui, titiarum tusar akikiarmiayi. ¹² Penḱé áentsun, tura uunt ainia nunasha, jintintin ármia nujaiṅsha chichaman júsar yajauch enentáimtikrarmiayi. Tura Estepaṅkan jintiá akirtuawar achikiarmiayi. Túrawar Israer-shuar naamka matsamarmia nui júkiarmiayi. ¹³ Tura wait chichamtinian itiararmiayi. Niisha taar chicharainiak “Yusa Uunt Jeṅ ti

pénker ana nu, tura Yusa akupkamuríncha ju Estepañ tuke yajauch chicharui, tiarmiayi. ¹⁴ Nú arantcha ju Estepañ tímia nu antukji, tiarmiayi. Estepañ chichaak “Nasarétnumia Jesuska Yusa Uunt Jeen sáaktiatui, tura nuyá Muisais in ikiurtamkimiaj nunasha yapajiáttawai” tímiayi. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

¹⁵ Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íiran wáinkiarimiayi.

7

Estepañ etserkamiania nu

¹ Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiayi.

² Tutai niisha áimkiamiayi “Winia úuntrutirmesha, yatsurtirmesha anturtuktarum. Ii Waantu Yusri ii úuntriñ Apraáman wantintiukmiayi. Apraámka Misiuputámia-Kartea nunkanam pujai, Aran nunkanam wéatsain, nui wantintiukmiayi. ³ Tura wantintiuk tímiayi “Ame nunkemsha áminiurmesha ikiukim nunka Wi iniaktustatjamena nui wetá” tímiayi Yus. ⁴ Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparí jakamtai “Arant wetá” tímiayi Yus. Nuna taku ju nunkan ii pujajnia jui pujsamiayi. ⁵ Túrayat nunkan ishichkisha súsachmiayi ju nunkanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirí penké

atsan nuní tímiayi Yus. ⁶ Nuyasha Yus tímiayi “Ame uchirmesha írara núnisaraṇ chíkich nunkanam pujusartatui. Nuisha emetamu itit awajtai pujuartatui. Kuatru siántu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtursartatui jú nunkanam’ tímiayi. ⁸ Yus tuke Apraámnasha chicharuk ‘Yamaikia Wí-shuar asarum tsupirnaktiniaitrame. Tuma asam amesha uchiram áishmankach akiiniamtai, Wi tímiajna núnismek, sirkunsisiún tutai, shunichiri nuape tsupirkata, tímiayi. Tura chícham Wí yamaikia ámiijai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant nankaamasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiksaṇ túramiayi. ⁹ Tura niisha ni yachín Jusen suiir íyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi. ¹⁰ Tuma asa, ashí ni itiurchatrinia uwemtikramiayi. Tura waitnenkartutairíncha nekatairíncha susamiayi. Tuma asamtai Ejiptunam uunt akupin Paraún Ejiptu nunkaa akupniuri ajasat tura ni jeen wáinniuri ajasat tusa anaikiamiayi.”

¹¹ “Tímiatam tsuka tura itiurchatcha ámiayi Ejiptu núnkanam. Tura jui Kanaan nunkanmasha núnisaṇ ámiayi. Tuma asamtai ii uuntri yurumkan penké wáincharmiayi. ¹² Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi.

Wats, ii úuntri_niun ujaajrume. ¹³ Tura ii uuntri_n atak Ejiptunam wéenak Jusesha, wítjai takui nĩ yachĩ Jusen nekaawarmiayi. Tura Jusé “Yatsur áiniawai” takui Paraun, antuk “au shuarapitia” tímiayi. ¹⁴ Nuyanka Jusé ni yachĩn chicharuk “Apar itiatarum uchirtuk” tímiayi. Nu shuarsha untsurĩ, setenta senku (75) matsamarmiayi. ¹⁵ Nunĩ tutai Jakupsha ni shuarijijai Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirisha ii uuntri_n ainia nu, núnisara_n nú nunkanman jákarmiayi. ¹⁶ Tura atak ukunam ni shuari_n Sikiam nunkanam ni ukunchĩn júkiar iwiarsarmiayi. Kame Sikiam nunkanam Apraámka yaunchu játsuk Amura uchirĩ_n nunken sumakmiayi. Túramtai nui iwiarsarmiayi’ tímiayi.

¹⁷ ‘Yus, Apraáman chicharuk “Nekas wi susattajme” tímiania nú tsawant jeatemantai, Ejiptu nunkanam Israer-aents pampa_nki ti kawen_nkarmiayi. ¹⁸ Nu tsawantinha Ejiptunam chíkich akupin naamka ámiayi, tura Jusen nekaachmiayi nii. ¹⁹ Nu akupin ii yaunchu úuntri_n anankawar yajauch awajiarmiayi. “Atumí uchirĩ kuírchich ana nu ajapa ikiuktiarum” tu wémiayi. Pampa_nkarai_n tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurĩ menaintiu nantu takusmiayi. ²¹ Tura nuyá ajapa ikiuktin jeamtai entsá apujsamiayi. Uunt Paraunka nawantri_n Muisaisan wainiak jukimiayi. Achik, ni uchirinia tímiatrusa_n júki tsakatmarmiayi. ²² Tuma asa Muisais unuimiátrauyayi ashí Ejiptu

aents nékarmia nuna. Túramurisha chichamesha kakarmauyayi.'

²³ Estepan tuke étseruk juna tímiayi: 'Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuari asamtai. ²⁴ Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishman kan máamiayi. ²⁵ Wíi turamujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha ninikia nekaacharmiayi. ²⁶ Kashin tsawar Muisais ni shuari jímíar maani pujuinian wáinkiamiayi. Tura nawamnaikíarat tusa "¿Urukamtai nuamtak yatsumjaisha yajauch awajniarum?" tímiayi. ²⁷ Tutai emka nankaama nu Muisaisan kárut shitiá "¿Ya amincha ii akuptamin tura ii chichartamin anaitiamkamam? ²⁸ ¿Winiasha maantuátaj tusam wakeramek, yaú Ejiptunmaya áishman máamamna nútiksamkea?" tímiayi. ²⁹ Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsan pujumiayi. Nú nunkanam pujus, nuatak, jimíará uchin yajutmarmiayi.'

³⁰ 'Kuarenta uwí nankaamas, nu atsamu nunkanam Senai náinnium tíjiuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi.

³² Yus tímiayi "Wiitjai Yus. Ame úuntrumí Apráama

Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura ístinian tujinmiayi. ³³ Nuyá Uunt Yus tímiayi “Úuntrun shiir awajsataj tusam, ame sapatrum ukuĩnkiam ikiuktia, wajamna nui Wi pujakui. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepan tuke étseruk: ‘Ju Muisaisan ni shuari “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yуска akupniun anaik uwemtikrarat tusa awaĩnki akupkamiayi. Numiniam ni suntari wantintiukmia nuna chichamejai Yуска Muisaisan akupkamiayi, tímiayi. ³⁶ Muisaisaiti Israer-aentsun Ejiptunmayan uwemtikramia nu. Yusa kakarmarĩn nekaawarat tusa, aentsti túrachminian untsurĩn túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. ³⁷ Jú Muisaisak Israer-shuaran chicharuk “Atumĩiniĩnak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. ³⁸ Jú Muisais Israer-aentsjai atsamunam pujumiayi. Senái nainnium Yusa suntari níjjaisha pujumiayi. Tura Muisaiska ii úuntriĩjai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiayi.’

³⁹ ‘Túrasha ii yaunchu uuntri Muisaisan umirkatniun nakitiarmiayi. Áaniuk imiá

umirtaint tusar Ejiptunam waketkitniun wakeriarmiayi. ⁴⁰ Túmainiak Muisais Yusjái chichastajtsa murá wématai nu shuar Muisaisa yachin Arunkan tiarmiayi “Ii yusrí najanató, ii nemarsatin. Áaniusha Muisaishsha Ejiptunmaya in juramkiyatcha tútsuk weruma” tiarmiayi. ⁴¹ Nuyá wáakachia áaniun najanawarmiayi. Túrawar, júiti ii yusrí tusar, kuntinian maantuawarmiayi, nu susatai tusar. Tura ni uwejejái najanamun ísar ti wararsarmiayi. ⁴² Nuna túruinian wáiniak Yus, iniaisajai taku, níiya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri juní áarmiayi:

““Israer-aentsu, kuarenta (40) uwitin atsamunam wekaimiarmena nui, ¿Winiak kuntin maanturtuamarum? Winia surustai tusarum penké túrachurme, tímiayi Yus. ⁴³ Antsu, Muruk naartin ántar-yusa pujamurin jukimiarme. Tura chíkich ántar-yussha, ni naari Rempan, yaa áanin najanarum nusha jukimiarme. Júkin asakrumin atumí nunkeya jukin, tímiai Papirúnia nunkan nankaiki akupkatjarne” tímiayi Yus.”

Nuní áarmaiti’ tímiayi.

⁴⁴ Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánató” tímiayi. Tutai Muisais Yus tímianak umikmiayi. Nu jeañ ii uuntri yaunchu takaku ármiayi. ⁴⁵ Nu jeañ ni uchirí akintkiar akintkiar wearmiayi. Uku-nam, jú nunka achiktin jeamtai, Yuska kapitíán Jusuejái jú nunkanmaya aentsun jiki akupkarmi-

ayi. Tura ii uuntri kapitián Jusuejai winiarmia nu, nu jeancha jú nunkanam itiarmiayi. Tura Tawit uunt akupin náamtsain, ii úuntri sha nu jean takaku ármiai. ⁴⁶ Kame Yus Tawitian yájau enentáimtichmiayi. Tuma asamtai Tawit Yus shiir pujustinian jean jeamtinian seamiayi. ⁴⁷ Túrasha antsu Tawitia uchirí Sarumún Yusa jeen jeammiayi. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia. ⁴⁹ Juna áarmiai: “Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarmea tarum? tímiayi Uunt Yus.

Tura Wi ayampratniusha, ¿tui aa?

⁵⁰ Wiki winia uwejruiain ashí najanachmakiaj” tímiayi.’

⁵¹ Estepañ tuke étseruk: “Tura átumka Israer-shuartirmeka atumí enentáijiai tuke umichuitrume. Atumí kuishisha weaktsui tura Yus nékachua núniniaitrume. Yusa Wakaníjiaisha tuke nemasnaikiaitrume. Tura atumí yaunchu úuntri jiai métek túrarme’ tímiayi.

⁵² ‘Iisia, atumí úuntri sha Yusa etserniurin tuke kagerin ármiai, tímiayi. Tura nú arant atumí úuntri sha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anankarum máachmakuram, tímiayi. ⁵³ Tura Yusa suntari nayaimpinmaya Yusa chichamen susamuitiatrum atumsha penké umikchamarme” tímiayi Estepañ.

Estepañka jakamuri

⁵⁴ Israer-aencha Estepaṇ tu chichaamu antukar imiá kajerkar nain kátetete awajiarmiayi. ⁵⁵ Tura Estepaṇsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharin, tura Yusa untsuurinini Jesusan wajan wáinkiamiayi. ⁵⁶ Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai” tímiayi. ⁵⁷ Támaitiat niisha kuishin akiriarmiayi, tura achiktai tusar charáa tiar ashí wajatkiarmiayi. ⁵⁸ Túrawar, péprunmaya arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurarmiayi Estepaṇkan.

⁵⁹ Tura Estepaṇka tukamaitiat Yúsan áujsamiayi. Tura áujuk “Uuntru Jesusá, winia wakantrusha jurutkitia” tímiayi. ⁶⁰ Tura tikishmar aukuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

8

Sauru Yus-shuaran kajerkarmiania nu

¹⁻² Estepaṇkan máawarmatai Sauru, péṇkeraiti, tímiayi. Tura áishman Yúsan péṇker enentáimta armiania nu, Estepaṇka ayashincha iwiarsarmiayi, tura aneenak ti uutiarmiayi. Tura nú tsawantai Yus-shuaran Jerusareṇnum pujuarmia nuna ti kajerkatan naṇkamnamiayi. ³ Sáuruka Yus-shuaran kajerak ti pataat wémiayi. Túmak nui jeá wayá, nui wayá áishmanasha

nuwancha wáinkianka japiki jukí sepunam enkeataj tusa túrimiayi. Tumakui Yus-shuar Jerusarénumia pisarar Jutía nunkanam, tura Samaria nunkanmasha jeawarmiayi. Jesusa akatramurinka antsu Jerusarénuman juakarmiayi.

Samaria nunkanam etserkarmiania nu

⁴ Túrasha Jerusarénumia aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusarénumia we tura chíchich péprunam Samaria núnkanam ámiania nuí jeá, chichaak “Yus anaikiamu ana nu Jesu-saiti” tu etsermiayi. ⁶ Túrakui aents iruntrar chikichík enentáijjai Jiripi étsereamun titiú pujusar antukarmiayi. Yusa kakarmarin nekaawarat tusa aentsti túrachminian túrimia nunasha wáiniarmiayi. ⁷ Ti untsurí aents iwianchruku ármia nuna Jiripi nu iwianchin jírki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi. ⁸ Tuma asamtai nú péprunmayanka ashí shuar ti warasar pujuarmiayi.

⁹ Tura nú nunkanam uwishin Semun pujumiayi. Nuikkia wí ímianaitjai tusa Samarianmaya aentsun anañniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semunsha Yusa kakarmarijjai áitkiawai.”

¹¹ Tura ti untsurí uwí wawekratmarijjai anankarta asamtai, umirkarmiayi nu aents.

¹² Túrasha Jiripi Yusa akupeamurin, tura Jesukrístununcha shiir chichaman etserkamiayi.

Tura, nuna antukar nuwasha áishmansha umikiar imian wearmiayi. ¹³ Semunsha imia uwishniuitiat Yus-Chichaman enentáimtus imianmiayi. Tura Jiripijiai tsanin wekaimiayi. Yusa kakarmarin shuar nekaawarat tusa Jiripikia aentsti túrachminian túrimiayi. Nuna wáiniak Semun ti enentáimsamiayi.

¹⁴ Tura Jesusa akatramurisha Jerusarénum pujuarmia nui Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juánnasha nekáa ikiuutarum tusa akupkarmiayi. ¹⁵⁻¹⁶ Tura Samarianmaya Yus-shuarsha aya Uunt Jesusa náariin imianiarmiayi. Yusa Wakaninkia tárachmiayi. Tuma asamtai Pítrusha Juanjai nui jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi. ¹⁷ Tura áujtua umikiar Pítiur Juanjai ni uwejen nú Yus-shuaran awantsarmiayi. Nuinkia Yusa Wakaní taramiayi.

¹⁸ Jesusa akatramuri uweje awasmanum Yusa Wakaní taramtai, Semunsha nuna wáiniak, kuitjai nu kakarman sumaktaj, tímiayi. ¹⁹ Tura Jesusa akatramurin chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítiur tímiayi Semunkan “Ámeke kuítrumjai métek menkakatniuitme. Warí, Yus amaana nu ¿kuitjai sumaktinkiait? ²¹ Yus esetram enentáimtachu asam nu túramu pachistincha penké tujinkiaime, tímiayi. ²² Enentáimprata. Túram Yus seata. Enentáimtamna nuna Yus

tsaṅkurtamprashtimpiash. ²³ Nékaime, tsaṅkea áintsan yapá enentáimin pimiutramkaiti. Tura tunaarmiṁ jinkíamua núniniaitme” tímiayi.

²⁴ Tutai Semuṁ áimkiamiayi “Uunt Yus aujtursatarum. Túrutrumna nuna túrunawaj tusan tajai” tímiayi. ²⁵ Nuyasha Jesusa akatramuri Jesusa túramuriṁ nú áentsun ujakarmiai. Tura wésar Samaria nuṅkanam pepru ámunmaṅka Yus-Chichaman nuṁ etserkiar, nuṁ etserkiar Jerusaréṁnum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntariṁ nayaimpinmayan Jiripincha akuptukmiayi. Niisha chicharuk tímiayi “Wátskea. Juyá jiinkim Jerusaréṁnumia jintia Eṅkasa péprunam wea nuní weme, anaraanṁ wetá. Nú jintiaka atsamu nuṅkanam naṅkaamawai’ tímiayi. ²⁷ Tutai Jiripisha wémiayi. Jintia wesa Itiupianmaya áishmaṅkan wáinkiamiayi. Nú áishmaṁsha Itiupia nuṅka akupniuriṁ, ni naari Kantasen takarniuyayi. Kantaseka núwauyayi. Tura nu áishmaṁ ti neka asa nuna kuítriṁ írniuyayi. Nú áishmaṁsha Yúsan áujsataj tusa Jerusaréṁnum wéu wáketmiayi. ²⁸ Karetanam eṅkemar wesa, Yusa etserniuriṁ Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakanṁ nin tímiayi “Nú kareta amayáṁta.” ³⁰ Tura Jiripisha amayáṁ, Yusa etserniuriṁ Isayasa áarmariṁ áujun antuk, chicharuk “¿Aujeamna nu nékamek?” tímiayi.

³¹ Tutai nú áishmaṁ tímiayi “¿Itiurak nekaataj? ¿Yaki jintintruat?” tímiayi. Tura antsu iijiai wetái tusa, Jiripincha eṅker jukimiayi karetanam.

³² Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi. ³³ Nincha iniatsárarmiayi. Túrasha penké chichamnaka tútsuk tsan̄kamakmiayi. Niisha nun̄kanam iwiaaku pujá maamu asamtai, ¿yaki nuna áujmatkat’?” Nuní aarma ámiayi.

³⁴ Kantase takarniuri Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniuri nínkik túmama? ¿Chikichnash ta?” tímiayi. ³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nan̄kaamak áishman Jiripin chicharuk “Juí entsá jeaji. Wikia juí imianchamniakaitiaj” tímiayi.

³⁷ Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. ³⁸ Tura, karetan awajas mai jíinkiar entsá wearmiayi. Nuí Jiripikia Kantase takarniur̄in imiaimiayi.

³⁹ Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniur̄isha Jiripin wáinkiachmiayi. Túrasha nin̄kia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá jiinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

9

Sauru Jesusan umirkamiayi
(Túramuri 22.6-16; 26.12-18)

¹ Nuna tumai, Jerusarénnun Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. ² Tura jeari tímiayi “Papí ame naarmijiai áaram surusta. Wi nuna papí jukin timiai Tamasku péprunam jean, Israer-shuar iruntainiam wayattajai. Túran nú papijiai Jesusan umirkaru ainia nuna, nánkamsan achikiartatjai. Túran áishmannasha nuwancha achikian jinkian, jui Jerusarénnun enkeataj tusan ikiaankattajai” tímiayi. ³ Tura papí susam Sauru jintiá wéai, Tamasku péprunam nuntumsai nui aya aneachma nayaimpinmaya tsáapin jiitsumir téntakmiayi nin. ⁴ Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nui, amek enentáimin yajauch awajmamsame, waaka sankanmiak numin iji-uma núnismek” tímiayi.

⁶ Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nui jeawakmin ame túratamna nuna turamiartatui” tímiayi.

⁷ Tura Sáurujaí irunar wearmia nu, chichaamun antukarmiayi. Tura áentsnaka penké wáinkiacharmiai. Tuma ásar ti ashamkarmiayi. ⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnum enkekiar júkiarmiayi Tamaskunam. ⁹ Nui jeá menaintiu tsawant íimtsuk tura yurumtsuk penké úmutsuk pujumiayi.

¹⁰ Nui Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.” Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nui wetá. Nuisha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsan áujuk pujawai. ¹² Tura juna mesekranam ipiatkamjai Sáurun. Aishman wayá ni uwejéjai ántiawai, ataksha íimit tusa. Nú áishmanka ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi. ¹⁴ Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishman kan winia etserniur atí tusan achikjai Wi. Niisha Israer-shuarchancha tura kapitíánniasha tura Israer-shuarnasha wínian etserin átatui, tímiayi. ¹⁶ Tura Sauru winia náarun páchia asa

ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru puja-munam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantin-tiurmakmamna nusha ame ataksha íimiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha íimmiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiai. Tura Yus-shuarjai Tamaskunam wárumchik tsawant pujus-miai.

Sáuruka Tamasku péprunam Yus-Chichaman et-serkamiania nu

²⁰ Nuyanka Sauru Israer-shuara iruntairin wayá Jesusa túramurin etserkamiayi. Etseruk tímiayi “Nekasaiti, ju Jesus Yusa Uchirinti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniuriin jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Úwemtikniuiti” tu etsermi-ayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarmiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha

nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusaréñnum wémiania nu

²⁶ Tura Sauru Jerusaréñnum jeá Yus-shuarjai iruntratts wakerimiayi túrasha nin_kia ashamiarmiayi. Sáurusha nekas Yus-shuar ajaschaiti tusar ashamiarmiayi. ²⁷ Túmainiajñ Pirnapí Jesusa akatramurí matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi. ²⁸ Tura Sauru Jerusaréñnum juákmiayi. Tura Yus-shuarjai irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjai áujmatsarmiayi. Túrasha nu shuar Sáurun itiur máatjik tusar chichaman juriarmiayi. ³⁰ Tura Yusaí yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

³¹ Tura Jutíanmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawen_ki kawen_ki wearmiayi.

Pítiur Eneasan yáinmiania nu

³² Tura Pítiur Yusai yachi armiania nuí iráa wekaimiayi. Wekaak Yus-shuar Rítianam matsamarmia nuísha iraumiayi. ³³ Nuísha Rítianam jeá áishmankan Eneas náartinian wáinkiamiayi. Niísha emearu asa wekaicha uchu uwí aya tépenuyayi. ³⁴ Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítianmaya aents tura Saruñmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nuí pujus tuke péñker túriniuyayi. Tura niísha nútiksan yayi wémiayi. ³⁷ Nu tsawantinik Túrkas sunkuran jateemak jakamiayi. Túrunamtai ayashin nijiarar yakí tesaamunam áepsarmiayi. ³⁸ Jupe péprusha Rítianmaya tíjiuch ámiayi. Júpenmaya Yus-shuar Rítianam Pítiur pujan nekaawar jimiará áishmankan akatrar akupkarmiayi, Júpenam wari winití tusar. ³⁹ Nuí tutai Pítiur níijiai wémiayi. Tura támatai jaka tepemia nuí awayáwarmiayi. Nuí wayamtai waje pujuarmia nu úutkiar Pítrun téntakarmiayi. Túrawar pushirín, Túrkas iwiaaku pujus najankamia nuna iniaktusarmiayi.

⁴⁰ Nuyanka Pítiur aa akupkarmiayi ashí. Tura niísha níñki tikishmar Yúsan áujsamiayi. Nuyasha nuwan jaka tepaan iis tímiayi “Tapitia nantaktia.”

Tutai niisha íimi Pítiur wajaan wáiniak nantaki pujusmiayi. ⁴¹ Tura Pítrusha nuwān uwejnum achik awajkiimiayi. Tura iniais Yus-shuar ármia nuna tura wajencha untsukar Túrkas iwiaaku aja-sun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi. ⁴³ Tura Pítruka Jupe péprunam untsurí tsawant nuapen-iwiarin Semun̄ka jeen pujusmiayi.

10

Pítiur Kurniriujaí

¹ Sesaria péprunam Kurniriu naartin suntara kapitiántri pujumiayi. Ni suntari Itiaria nun̄kanmaya ármiai. ² Nu kapitián Kurniriu ni shuaríjjaí, Yuska nan̄kaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksā kuítniasha takakchan yáíntaj tusa Israer-shuaran súuyayi. Tura tuke tsawant Yúsan áujtiniuyayi. ³ Chíkich tsawantaj, nantu aanku ajasaj Kurniriu íimiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarín ashamak íimia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’ tímiayi. ⁵ Tura Yusa suntari Kurniriuun tuke chicharuk “Wats, áminiuram Júpenam akupkata. Semun̄, chíkich naari Pítiur, tatí tusam akuptukta, tímiayi. ⁶ Nu Semun̄sha chíkich Semun̄jaí pujawai. Nuka nuapen-iwiarin

Semun_ukaiti. Tura ni jeesha nayaantsanam ayaa-mach pujawai, tímiayi. Nui jeawakmin, ame túratamna nuna Semun Pítiur turamtatui” tinia ikiukmiayi. ⁷ Tura Yusa suntari waketkimtai, Kurniriuka ni takarniurin jímíaran itiamiayi. Tura suntaran chikichkinjak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. ⁸ Kurniriusha ni túrunamurin ashí ujáa-já awajas Jupe péprunam akupkarmiai.

⁹ Kashin tsawantai Kurniriu suntari Júpenam nuntumsarai, tutupin ai Pítiur jea yaki wáakunam Yúsan áujsatajtsa wakamiayi. ¹⁰ Pítrusha

ti tsukamak yurumátaj tusa wakerimiayi. Túrasha yurumkan iniarainiai Pítiur íkiajtiusmak, ¹¹ nayaimp uranmianum wan_ukaram tarachia áanin tura nuna tsakarín jin_ukiakman tárún wáinkiamiayi. ¹² Nu tarachnium yajasma irunmiayi. Wekainiusha, nanamtincha, tura napisha en_ukemiarmiayi. ¹³ Tumai Yus Pitrun chicharuk “Pitru, wajakim maam yuata” tímiayi.

¹⁴ Tutai Pítiur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka pen_uké yúchaitji. Tuma asamtai júnaka wikia yuashtatjai” tímiayi.

¹⁵ Túrasha Pitrun atak Yus chicharuk “Wi, pen_ukeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach ataksha nayaimpiniam wakamiayi.

¹⁷ Nuna túrunan wáiniak Pítiur wariniak áaniuncha wáinkiaj tusa enentáimia pujai kapitíán Kurniriu ayakma armia nu, anintruiniak jeawariayi.

¹⁸ Tura jeawar kakantar untsummiar “¿Semun, Pítiur, juin_u pujá?” tiarmiayi.

¹⁹ Tura Pítruka íimiarmarín tuke enentáimia pu-jai Yusa Wakaní chichaak “Menaintiu áishman unturmainiawai, tímiayi. ²⁰ Wajakim akaikim arantutsuk au nemariarta, Wi akupkamu asam-tai” tímiayi.

²¹ Nuna antuk Pítiur taramiayi. Tura áishman kan Kurniriu akupkama nuna wajainian wáiniak “Witjai Pítiur. Átum eattrumna núitjai. ¿Warí tarin-trum?” tímiayi.

²² Tutai niisha tiarmiayi “Isha kapitián Kurniriu akupkamu taji. Kurniriuka áishman péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Níiya winiaji, tiarmiayi. Kame nuik, Yusa suntari, nayaimpinmaya akupkamu, ii kapitiántrín tímiayi “Pítrun untukát akupkata. Nii tatí. Tura nii títiatna nu péñker anturkata” tímiayi. Nuna ii kapitiántrín takui iisha winiji” tiarmiayi.

²³ Tutai Pítiur jeá awayámiayi. Tura nu kashi nui kanararmiayi.

Kashin tsawarar Pítiur níijai wearmiayi. Túrasha Júpenmaya Yus-shuarsha nin nemariarmiayi. ²⁴ Nuyá tsawarar Sesaria péprunam, Kurniriu nákamun jearmiayi. Kurniriuka ni shuarín tura ni nekas amikrín, nekaatarum tusa untuk ikiaankamiayi. ²⁵ Tura Pítrusha jeamtai Kurniriu aa jiintiuki Pítrun tikishmatramiayi. ²⁶ Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. ²⁷ Tura chichasar jeá wayáwarmiayi. Tura wayá, unturí aents matsatun wáinkiamiayi. ²⁸ Nuyá Pítiur chichaak tímiayi “Amikrua,

atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashtiniaitrume in jintintramin turamainiaji, tímiayi. Túrasha Yuska ni enentáimsamurin wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamnaitjai, tímiayi. ²⁹ Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

³⁰ Tutai Kurniriu tímiayi “Kuatru tsawant nankaamasai tura nantusha juni ai, wikia yurumtsuk Yúsan áujsamjai, kiarai áujsatín ana nuna. Túran chichai, áishman, ni entsatairi wincharpatniun, naka wajatran wáinkiamjai, tímiayi. ³¹ Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi. ³² Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha jui Yus íimmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus íimmianum ashí aents métekrak áiniawai nekas nékajai, tímiayi. ³⁵ Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtawai, tímiayi. ³⁶ Yuska shiir chichaman Israer-aentsun akuptukmiayi. Nui chichaak “shuar Jesukrístu naarín páchiakka, Yusjaj nawamnaikiatin átiniaiti, tímiayi. Nú Jesukristu ashí shuara Úuntrinti’ tímiayi Yus. ³⁷ Túrasha Kariréa nunkanam nanmakam ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nankamamiayi. ³⁸ Tura jusha nékatsrumek, tímiayi. Nasarénumia Jesus, Yus Anaikiamu asa, Yusa Wakaní kakarmarijiaí péñker túriniuyayi. Iwianchruku wáitias pujuarmia nuna péñker awajsamiayi. Yus Niin pujurma asa ashí nuna túriniuyayi. ³⁹ Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étserieaji. Tura ayu, Nin achikiar krúsnum máacharmakia, tímiayi. ⁴⁰ Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakají, tímiayi. ⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmiaj nú áentstiniak wantintiurmakmiaji, tímiayi. Au nekas jakamunmaya nantakmiatai iisha Niijiaí tsaniñkiar yurumámji, tímiayi. ⁴² Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki

títiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi. ⁴³ Ya shuarak Jesusa náarín pachia nú shuarnaka tunaarín tsankurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujai, tura chikichcha antúu pujuiniaí Yusa Wakaní tarurarmiayi. ⁴⁵⁻⁴⁶ Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha áinia nunasha tarurcharaik, tu enentáimsarmiayi ⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi. ⁴⁸ Nuyá Pítiur, Jesukrístu náariin imiantiarum tusa akupkarmiayi. Tura nuyasha Pitrunka, niijiai ishichik tsawant pujustinian seawarmiayi.

11

Ni túrunamurín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurísha tura Jutíanmaya Yus-shuarsha antukarmiayi.

² Túmainiak Pítiur Jerusarénum jeamtai, Israer-shuar Yus-shuar ármia nu chichainiak

³ “¿Urukamtia Israer-aents áiniachusha iyumam?

¿Tura aujai tsaninkiam urukamtai yurumámum?” tiarmiayi.

⁴ Tutai Pítiur ashí yámankamtaiknumiá túrunamun ujakmiayi. ⁵ Chichaak tímiayi “Wikia Jupe péprunam pujumjai. Tura nui Yusan auju pujusan íimiarmajai. Tura wan̄karam tarachia áanin kuatru tsakar̄in jin̄kiakma, nayaimpinmaya táarun wáinkiamjai. Tura wi pujamunam jeartimiai, tímiayi. ⁶ Tura nui iiyaj tukaman init yajasman, napincha, nanamtinniasha en̄ketainian wáinkiamjai, tímiayi. ⁷ Tura chichaman antukmajai “Pitru wajakim maam yuata” túrutun antukmajai, tímiayi. ⁸ Túrutkui “Atsá, Uunta, áanin wapiknaka, Israer-aents yuatin surinkiamu ana núnaka tuke yúchaitjai” tímiajai, tímiayi. ⁹ Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi. ¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. ¹¹ Nui túruna pujai menaintiú áishman̄ Sesarianmaya akupkamu, winia ēatainiak wi pujamunam tarutiarmiiai, tímiayi. ¹² Tura nui Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashinkiar Kurniriu jeen wayam̄ji, tímiayi. ¹³ Niisha chichaak “Jearui Yusa suntarī nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun̄ Pítiur tatí tusam áishman̄ akatram akupkata. ¹⁴ Pítrusha taa, itiura amesha tura áminiurmesha tunaarminiā uwemprattam nuna turamtatui.” Yusa suntarī nuní turutmiai” tu ujatkamiayi

Kurniriu' tímiayi.

¹⁵ 'Wi chichastasan júaraj, Yusa Wakaní tarurarmiyai, yámankamtaik in tarutrampramij nútiksaj, tímiayi. ¹⁶ Nuinkia Uunt Jesus timian enentáimpramjai. Niisha tíchamka "Juan entsajaj imiakratmiayi. Tura antsu Yusa Wakanínkia imiantinia áintsaj atumí enentáin enkemprutmattarme." Nu timian enentáimpramjai, tímiayi. ¹⁷ Atumsha enentáimpratarum. Uunt Jesukrístu umirkamij nui, incha Yuska ni Wakanín suramsamij. Tura in suramsamij núnisaj Yus nincha ni Wakanín súarmiayi. Nuna tura asamtai, wikia, túrashtiniati, Yúsaj títinkiaitaj" tímiayi Pítiur.

¹⁸ Tura Pítiur taman antukar mitiat wáinkiar "Nekasaiti, Israer-shuarchancha ni enentáin yapajíawarmatai tuke iwiaaku átinian Yuska nin súsaruiti" tiarmiayi. Tusar Yusa náaraj ti shiir awajarmiayi.

Yus-Shuar Antiukía péprunam wearmiania nu

¹⁹ Estepankan máawarmia nui, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nunkanam, Chipri nunkanmasha, tura Antiukía péprunmasha wearmiayi. Tura nui jeawar Yus-Chichaman chikichnaka ujatsuk aya Israer-aentsnak ujakarmiayi. ²⁰ Tura níijaj Chipri nunkanmaya pisararmia nu Serini nunkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramuraj ujakarmiayi. ²¹ Tura Uunt Jesus ikiakárma ásar, nú nunkanmaya

aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumiá Yus-shuar, ame iyutá tusar, Pirnapín Antiukíanam akupkarmiayi. ²³⁻²⁴ Pirnapísha jeá, Yus nú shuaran uwemtikrarma nuna wáiniak warasmiayi. Pirnapísha péñker áishmankauyayi. Yusa Wakanísha pimiutkamuyayi. Tura Yúsanekas umirkauyayi. Tuma asamtai nu shuaran mash jintintiainiak chicharuk “Tuke enentáimjai umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusai kawenkararmiayi.

²⁵ Nuna turasua amik Pirnapí Tarsu péprunam wémiayi Sáurun wáinkiatat tusa. Tura wáiniak Antiukía péprunam jukimiayi. ²⁶ Tura nuí jeawar, nú péprunmaya Yus-shuarjai iruntrar chikichík uwí pujusarmiayi. Yus-Chichaman untsurí shuáran ujaak pujuarmiayi. Tura nuí Antiukía péprunmanka Yus-shuaran émkaka, Kristu shuari, tiarmiayi. ²⁷ Nuyá Yusnan etserin Jerusarénumiá táarmiayi Antiukíanam. ²⁸⁻³⁰ Túmainiai chikichík etserin, ni naari Akaapu, Yus-shuar matsatmanum ajapén wajaki chichasmiayi. Tura Yusa Wakaní nekatairijjai chichaak “Ti tsuka ashí núñkanam átatui” tímiayi. Tuma asamtai Antiukíanmaya Yus-shuar chichainiak “Jutía nunñkanmaya Yus-shuar ainia nu yáintai” tiarmiayi. Ankant ankant ni wakeriarmia núnik súsarmiayi. Tura nú kuítniasha Jutíanmaya Yus-shuara úuntrin akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu

pujai.

12

Pitrún sepunam enkeawarmiania nu

¹ Nu tsawantaj akupin Erutis Yus-shuaran máataj tusa chichaman jurus áentsrín ishiakmiayi.

² Tura Juanka yachín Jakupun suen tsupirkar máawarmiayi. ³ Nuna tura máawarmatai Israer-

aents wáinkiar “juka péñkeraiti” tiarmiayi. Erutis-sha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi. ⁴ Pítruncha

achik itiarmatai, Erutis sepunam enkeata tusa akupkamiayi. Tura sepunam suntarsha ankant ankant, kuatru kuatru, ashikia tiasisáis (16) irunar Pitrun téntakarmiayi. Tura, ju jísat nankaasmatai, mantamnátí tusan jiiaktiatjai aents iruntramunam, tu enentáimsamiayi Erutis.

⁵ Túramu asa Pítruka sepunam pujumiayi. Tura suntarsha mijiatrutsuk iiyarmiayi. Túramunak Yus-shuarka, Pitrun yáinkiat tusar iniaitsuk Yúsan ti áujiarmiayi.

Yusa suntari Pitrun uwemtikramiania nu

⁶ Wats, Erutis, kashin jiiaktiajai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jinkiamuyayi. Tura chíkich suntarka jínmanum ii wajarmiayi. ⁷ Tumaj aya aneachma Yusa

suntari nayaimpinmaya taa ajapén wajasmiayi. Túrunamtai jeanmanka tsáapin ajasmiayi. Tura Yusa suntarisha Pitrun páenum antin ishintiarmiayi. Tura jirusha Pitru uwejéya

sayat atiniamiayi. ⁸ Tura Yusa suntarí tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi. ⁹ Tutai Pítiur nemarsamiayi. Túrasha Pítruka, mesekranmaapi júniaya, tu enentáimsamiayi. ¹⁰ Túrasha emka suntar íimia wajan nan̄kaikiarmiayi. Tura nuyasha chíkich suntar íimia wajan nunasha nan̄kaikiarmiayi. Tura nuyasha jíintiainium jiru waiti ámanum jeawarmatai, nú wáitisha íimia-nin̄ki kuat uranmiayi. Túrunamtai jíinkarmiayi. Tura jintiá ishichik wésan̄, Yusa suntarí Pitrun níiniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarin̄ nekas akupturkayi. Erutis mantu-ataj tusan pujurtana nuyá Yusa suntarí winia uwemtikrurai. Tura Israer-aents túrutatajtsa wak-eriarmia nuyasha uwemtikrurai” tímiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainai Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwá uchich, ni naarí Rutí, yákit tusa iyumiayi. ¹⁴ Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, init matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsumek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

16 Tu chichainia_in Pítruka tuke tuntuí wajami-ayi. Tura wáitin uraj tukamá Pitrun wáinkiar ashankarmiayi. 17 Ashamak chichainiakui Pítur, uweje takuí itiatmamtikiarmiayi. Tura nuyá Uunt Yus sepunmayan uwemtikramun ujakmi-ayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna t_i iniaais jiinki arant wémiayi.

18 Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítur túrunamun nékachu ásar nuna tiarmiayi. 19-20 Túrunamtai Erutis chichaak Pítur eaktarum tusa akupkarmiayi, túrasha wáinkiacharmiai. Túrunamtai Erutis suntaran untsukar, Pítrun ísarmia nuna aniasarmiayi “¿Pítur itiura menkakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tijiuchiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakeriarmiayi. Tuma asantai métekrak enentáimsar, Erutisa takarniur_i penker_i, ni naar_i Parastu, niijai emka amikmawar nuyá Erutisan weriar shiir matsamsatniun seawarmiayi. 21 Tuma asantai tsawant jeamtai Erutissha akupin entsatai pushin entsarmiayi. Tura akupin pujutainium

pujus áentsun ikiaanak áujmatmiayi. ²² Nui pujus chichaakui aents untsumainiak tiarmiayi “Ju chichaa pujana juka áenchaiti. Antsu nekaska yúsaiti” tiarmiayi. ²³ Tumai nuyaik Yusa suntari nayaimpinmaya tari Erutisan jaa awajsamiayi. Tuma asamtai nusha aka yuam jakamiayi. Erutissha Yusan waantu awajtsuk ninki waantu enentáimtuma asa túruna jakamiayi. ²⁴ Túrunamtaisha Yusa chichamenka nú arant pampanki wémiayi. Túmaki ashí núnkanam anturamiayi.

²⁵ Tura Pirnapísha Sáurusha ni takatrin amukar Jerusarénumiá Antiukíanam waketainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmaya Yus-shuarnum Yusnan etserin páchitra ármiai. Nútiksá Yus-Chichaman jintinniurísha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Man-aen, Sáurusha tímianu ármiai. ² Tura chíkich tsawantai niisha yurumtsuk Yúsán áujeak pujuiniái Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi. ³ Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiukíanmaya akupkarmiayi.

Chipri nunkanam jeawarmiayi

4 Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiyai. Tura nuyá uunt kanunam enkemprar Chipri nunkanam jeawarmiyai.
 5 Juansha yáintaj tusa némarkauyayi. Nui Saraminia péprunam jeawar Israer-shuar iruntai jeanam wayawar Yus-Chichaman etseriarmiyai.
 6 Tura Chipri nunkanam pepru ainia nui wáirkutak Papus péprunam jeawarmiyai. Nui jeawar Israer-aents uwishin ni naari Parjesúsan wáinkiar Miyai. Ni chíkich náarinkia Erimiasauyayi. Niisha uwishniuitiat, Yúsnan étsereajai, tíniuyayi.
 7 Akupin Serjiu Páurujai pujuyayi. Nu akupniusha ti pénger enentáimniuyayi. Tura Pirnapín Sáuruncha chichaman akuptukmiyai, taarti tusa. Kame Yus-Chichaman antuktaj tusa wakerak untukmiyai. 8 Tura uwishin Erimias nuna nakitiak “Auka péngerchaiti” tímiyai. Akupniusha Yúsan umirkain tusa nuna tímiyai.
 9 Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiyai 10 “Ámeke wáitaitme. Anankartiniaitme. Yajauchiitme. Maaj, iwianchiitme. Tura ashí pénger ana nuka imiá nakitniuitme. Tsej, ¿urukamtai Yusa jinti naka ana nu emeskim weam? 11 Paij, yamaikia Uunt Yus asutiámattawai. Yamaikia amesha jimi kusurmatai unturí tsawant tsáapnin penké íischattame” tímiyai. Tura nú chichamaik jii kusurmatai kirit íimiuk chikichan eamiyai enkeki jurukit tusa. 12 Nu túrunamtai akupin nuna wáinak, ti enentáimpramiyai. Túruna Uunt Yusa chichamen

enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai. ¹⁴ Nuyá Pirji péprun nankaikiar Antiukía péprunam jeawarmiayi. Nú Antiukíasha Pisitia nunkanam pujawai. Nui jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. ¹⁵ Tura nui Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintiatin chicham takakkurmeka yamaik titiarum. Antukarmi” tiarmiayi.

¹⁶ Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. ¹⁷ Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainai Yuska nin páchiniak uunt awajsarmiayi. Yus ni kakarmarijjai nú nunkanmaya ii yaunchu uuntrin uwemtikrarmiayi. ¹⁸ Túrasha atsamu nunkanam ii uuntrin kuarenta (40) uwitin Yuska aya kátsuntramiayi. ¹⁹ Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrin susataj tusa Yus túramiayi. ²⁰ Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi.

Nuna tura túraakua kuatru siántu senkuenta (450) uwí ejemiayi. Samuersha Yúsna etserin náamtsáin nuna túrimiayi Yus. ²¹ Tura nuyanka áencha juísan nakitiainiak, uunt akupin náamkat tusar Yúsna seawarmiai. Tuíniakui Yuska Sesa uchirín Saúran anaikiamiayi. Nú Saúra úuntrinkia Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsan̄katkamiayi. ²² Tura Saúr náamkan ataksha Yus awain̄kimiayi. Tura nuyá iiksan̄ nú nun̄kanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatui” tímiayi. ²³ Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarin̄ uminkiat tusa. ²⁴ Jesuska táatsain̄ Juan̄ ashí Israer-shuaran tunaarin̄ia enentáimtumar imiantinian ujakmiayi. ²⁵ Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Nínkia winia ukunmarui winittiwai. Tura Niisha wíjiain̄kia ti nan̄kaamantu asamtai wikia sapatríncha atitrataj tíchamniaitjai” tímiayi.’

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiayi. ²⁷ Iis, Jesusa túrunatniurín Yuska yaunchu ni etserniurín áamtikrachmakia. Tura ukunam Jerusarénnun̄mía shuar ni akupniurijjai tuke sáwartin nuna áujeatskesha pen̄ké nekaacharmiayi. Tuma ásar Jesuska Yusa Uchirinti tícharmiayi.

Tura, jakatí, tiarmia nui, Jesusa túrunatniurin, Yus yaunchu chichakmia nuna, tímiatrusarañ umikiarmiayi, tímiayi. ²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi. ²⁹ Tura Yusa Papiriin ashí Jesusnan tímia nuna tímiannak umikiarmiayi. Tura nuyá krúsnumiā itiarar iwiarsarmiayi. ³⁰ Túramunak Yus jakamunmayan iniantkimiai. ³¹ Jesuska jakamunmaya nantaki, yaunchu Kariréanmaya Jerusarénum Niijjai irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurin etserainia nu' tímiayi.

³² 'Tisha núnisrik shiir chichaman Yus yaunchu ii apachrín tiarmia nu étseaeji. ³³ Iisha Israer-weeá asakrin, Yuska Jesusan iniantkimia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar
susamuitme.”

³⁴ Tura Yuska Jesusa nantakmiarín jintintiaik, tura ni ayashí káurchatniun jintintiaik, chíkich Sarmu papinium juna áamtikramiai:

“Nekas péñkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí
káurtincha tsankatkashtatme.”

³⁶ 'Nekaatarum, yatsurtiram, Yuska Tawitia ayashín tíchamiayi nuna. Tawitkia Yus tímian amuk jakamiayi. Túrasha ni ayashínkia káurmiayi.

³⁷ Tura antsu Yus iniantkimia nuna ayashĩkia penké káurchamiayi. ³⁸ Tuma asamtai, yatsurtiram nekaatarum. Jesusjainkete tunáa asakártin. ³⁹ Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniaiti. ⁴⁰⁻⁴¹ Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nui, aents túrachminian túratajna nusha penkesh nekaashtatrume, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawairum, Yusnan etserin aarma tana nútiksan.” Nuna chichaak amukmiayi Papru.

⁴² Tura nuyá Papru Pirnapíjjai jiinki wéenakui aents chichainiak “Chíkich sáwartincha jútiksarmek etserkatarum” tiarmiayi. ⁴³ Tura nuyá iruntsua tsenkeenak Israer-shuarsha, tura chíkichkia Israer ajarusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Ni-isha nu áentsun chicharuk “Yusa anenkrattairi enentáimtusum kakartarum” tiarmiayi.

⁴⁴ Tura chíkich sáwartinkia nu péprunmaya ti untsurí aents Yus-Chicham antuktai tusar tuakarmiayi. ⁴⁵ Tura Israer-shuarka ti untsurí áentsun tuakarun wáinkiar, suir iiniak, ti kajerarmiayi. Tuma asamtai Páprun katsekkar “Ju chichaana juka ántar tawai” tiarmiayi. ⁴⁶ Támaitiat Pápruka Pirnapíjjai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha

átum támaitiatrum nakitramarme. Tura atumsha nakitia asarum, Yúsnum tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. ⁴⁷ Nu túratarum tusa, Uunt Yus akuptamtsujik. Jes, ni Papiriin juna tawai:

“Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. ⁴⁸ Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiai.

⁴⁹ Tú tumakj Yus-Chicham nú nunkanam ashí jamarmiai. ⁵⁰ Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiayi.

Áishman penkeri ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiai. Tú-turukiar ni nunkeya jiki awemarmiai.

⁵¹ Túram Papru Pirnapíjiai, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmai. ⁵² Yusa Wakanísha pimiútkamu ásar Yus-shuarka ti warasarmiai.

14

Ikiuniu Péprunam túrunamia nu

¹ Ikiuniu péprunam Papru Pirnapíjiai jeawar Israer-shuar iruntai jeanam wayawarmiai. Túrunawar Yus-Chichaman etserkarmiayi.

Túram ti untsurí Israer-shuar ármia nu, Israer-shuarcha ármia nusha Yúsan umirkarmiaiyi. ² Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiaiyi. ³ Tuma asamtai Papru Pirnapíjiaí nú núñkanam ti nukap tsawant pujusarmiaiyi. Tura Uunt Yúsan enentáimtuinia ásar, arantutsuk Yusa waitnenkratairín etserkarmiaiyi. Tura, etserinia nu winia kakarmarjainti tusa, Yuska aents túrachminian najanmamtikiawarmiaiyi. ⁴ Tura Ikiuniunmaya aentska jímiar kanakarmiaiyi. Chíkichkia Israer-shuar tuinia nu nekasaiti, tiarmiaiyi tura chíkichkia Jesusa akatramurí tuinia nu nekasaiti, tiarmiaiyi. ⁵ Tura nuyá Israer-shuarchajai Israer-shuarka chichasar pepru uuntriíjiaí chichasarmiaiyi. Tura Papru Pirnapíjiaí katsekkar tura kayajai tukurar, yajauch awajsatniun nanñkamawarmiaiyi. ⁶ Túrasha Papru Pirnapíjiaí nuna anturmamkar, Ristra péprunam wearmiaiyi. Nuyasha Tirpi péprunam wearmiaiyi. Nu péprusha mai Rikiaunia nuñkanam pujuiniawai. ⁷ Tura Yus-Chichaman etserkarmiaiyi.

Ristra péprunam Páprun kayajai tukurarmiania nu

⁸ Ristra péprunam tunamaru áishman pujumiyaí. Ni akiiniamuríya tuke wekaichauyayi. ⁹ Nú áishman Papru chichaamun antúu pujumiyaí. Túman Papru úmamkemas nin ísmiaiyi. Niisha, Yusa kakarmaríjiaí tsuamartatjai, tu enentáimiun Papru nekaamiyaí. ¹⁰ Tura Pápruka kakantar chicharuk “Wajakim wewe ajasam wajasta”

tímiayi. Tutai áishman wiut kutsuar wajaki wekaimiayi. ¹¹ Papru túramia nuna aents wáinkiar Rikiaunia chichamjai untsumainiak “Yuska áishmanka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijiai wáakan maatai tusar pujuarmiayi. Tura tikishmatrar ajamsatai, tiarmiayi.

¹⁴ Tura Jesusa akatramuri Pirnapísha Páprusha nuna nekaawar, auka nakitiaji tusar, ni pushirin jaararmiayi. Túrawar aents írunmanum pachini-awarmiayi. ¹⁵ Tura tiarmiayi “Shuara, ¿urukamtai áitkiarum? Iisha yúsachitji. Atumea áankiitji, tiarmiayi. Penké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nui írunna nunasha najanaiti, tiarmiayi. ¹⁶ Jes, aents ni enentáimmiarijiajin wekasarat tusa Yuska yaunchu tsankatkamiayi. ¹⁷ Tuma ain shuaran penker awajsamujai Wiitjai Nekas Yus tusa paant awajmamsamiayi. Kame yumi yutuk-tinian nayaimpinmaya akupturmaji. Tura ejemamar warasarmí tusa yurumak nerektinniasha súramji” tímiayi.

¹⁸ Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

19 Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutaí Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi. 20 Túrasha Yus-shuar Páprun tariar téntakarmiayi. Túram nuĩkia Papru wajaki wé ataksha péprunam wayamiayi. Tura kashin tsawarar Papru Pirnapíjiai Tirpi péprunam wearmiayi.

21 Tírpinium pujusar uwempratín chichaman etserkarmatai untsurí shuar Yúsán umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. 22 Waketainiak “ashí Yus tana nu tímiatrusrumek tuke umirkatarum” tuíniak Yus-shuaran ikiakáarmiayi. Tura nin tiarmiayi, “Yusa akupeamuriin pachiinkiatáj tákurkia ti wáitsatniuitji.” 23 Tura Yus-shuar írunmanum Yus-shuaran wáinnium anaikiarmiayi. Yurumtsuk Yúsán áujsar chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam waketkiarmiayi

24 Nuyá Pisitia nuñkanam nankaamaklar Pampiria nuñkanam jeawarmiayi. 25 Nui jeawar Pirji péprunam Yus-Chichaman etserkar nuyá Ataria péprunam wearmiayi. 26 Nui kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsain nú Antiukíanmaya Yus-shuar chichainiak, Yusa takatri túrattarmena nuna Yus waitnentrarak yáinmakarti, tiar

akupkarmiaiyi nuikⁱ. ²⁷ Nú Antiukíanam jeawar, Yus-shuaran irurar, ashí Yus nin yáinkíarmia nuna ujakarmiaiyi. Tura nútiksán Israer-shuarchan Uunt Yus uwemtikrataj tusa untukmia nunasha ujakarmiaiyi. ²⁸ Tura nuyá Yus-shuarjaj Papru Pirnapíjjaj núkap tsawant pujusarmiaiyi.

15

Jerusarénum Yus-shuara úuntrijaj iruntrarmia nu

¹ Nu tsawantin áishman Israer nunkanmaya wear, Antiukíanam jeawar Yus-shuaran jintintiniak “Muisais tímia nútiksarmek tsupirnaktin ana nu túrachkurmeka uwemprashtatrumé” tiarmiayi. ² Tuma asamtai Papru Pirnapíjjaj, núchaiti tusar, nú áishmanjaj ti kakaram chícharnaikiarmiayi. Túrasa nuu enentáiniak enentáimsatniun tujinkíarmiayi. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjaj Jerusarénum wétarum tusar akupkarmiaiyi. “Tura nuí Jesusa akatramurisha Yus-shuaran wáinniusha iniasrum itiurmainkit tusarum péñker nekaatarum” tiarmiayi. ³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiaiyi. Tura Yus-shuarsha nuna antukar ti warasarmiaiyi.

⁴ Tura Páprusha Pirnapísha Jerusarénum jeawarmatai Jesusa akatramurisha Yus-shuara wáinniurisha tura penké Yus-shuarsha itiawarmiaiyi. Tura niisha túrunamia nuna mash

etserkarmiaiyi. ⁵ Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi. ⁶ Nuyasha Jesusa akatramurisha Yus-shuaran wáinniusha nu chichaman nekaatai tusar iruntrarmiaiyi. ⁷ Chichasua umikiarmatai Pítiur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. ⁸ Tura Yus Nínki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchancha susamiayi, in suramsamiaj nútiksā. ⁹ Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyān ni tunaarīn japirarmāi, tímiayi. ¹⁰⁻¹¹ Tura iikia nékaji niiya áantsarik Jesukrístu waitnenkartutairijiai uwempraitji. Nuínkia ģurukamtia Yus uwempraru áiniawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsānchakait. Warí, ii úuntrisha tura iisha ashí Muisais tímia nu umiktin tujinkiamji. Tuma asamtai, ģurukamtai nú káarkasha Israer-shuarchasha áentskatin wakerarum?” tímiayi Pítiur.

¹² Pítiur nuna tutai Pirnapísha Páprusha chichainiak, “Israer-shuarchasha ni kakarmarīn nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi. ¹³ Nuna ujasua amikmatai,

Jakupusha tímiayi “Yatsurú, antuktarum. ¹⁴ Nuik túrachman Yus túramia nuna ii yachi Semun Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi. ¹⁵ Jusha Yúsnan etserin yaunchu áarmia nu tímiatrusan túrunayi. Júiti aarma:

¹⁶ “Israer-aents meserar, jea sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nunkanmaya aents, Israer-shuarcha ainia nu, winia náarun pachinia nu, Winia eátkarat tusan túrattajai. ¹⁸ Uunt Yus nuna yaunchu ujakmiayi.”

Tu áarmaiti’ tímiayi.

¹⁹ ‘Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi. ²⁰⁻²¹ Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarín jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.

²² Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiai wéakui, shuar níijiai nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-

shuar ármiai. ²³ Tura niijjai ju papin áarman akupkarmiai:

“Isha Jesusa akatramuri tura Yus-shuara wainniuri tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume. ²⁵ Tuma asamtai nu nekaar, iisha métekrak enentáimsar, jimiará áishman akupkatin anaikiamji. Ju áishman ii aneamu yachi Páprujai Pirnapíjjaisha atumin íirmasarat tusar akupeaji. ²⁶ Papru tura Pirnapísha ii Uuntri Jesukrístunam surumakarmiai, ni takatrisha tsuumai ain túrami tusar. ²⁷ Niijjai Jútassha tura Sérassha akupeaji. Ii chichaajnia nuna niisha ni wenejai atumin ujatmakartatui. ²⁸⁻²⁹ Kame túratin asamtai iisha Yusa Wakaníjjai ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichkia nú nankaamas tíchattaji. Tura antsu nu iniaisarmeka, pénger áatrume. Ayu, Yus wáitmakarti.” Tu áarman akupkarmiai.

³⁰ Tura Antiukíanam akupkam wearmai. Nui

jeawar Yus-shuaran irurar, papin súsarmiayi.
³¹ Tura Antiukíanmaya Yus-shuarsha nu papin áujsar, péñker jintíamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. ³³ Tura nui ishichik tsawant pujusarmatai, Yus-shuarka, péñker wakеткиtiarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjjai juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nui Yusai ii yachi ainia nusha urukák pujuinia iyutai” tímiayi.

³⁷ Pirnapíkia Juan Márkusan iijjai winiti tusa wakerimiayi. ³⁸ Tura Pampiria nunkanam Juan Márkussha niisháa weu asamtai tura Yusa takatrín iniaisa asamtai, Pápruka ayatniun nakitramiayi. ³⁹ Papru Pirnapíjjai ti kakannairar kanakarmiayi. Tura Pirnapíkia Márkusan ayaki Chípriniam wémiayi. ⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

1 Papru Sérasjaj Tirpi pepu írkutak Ristra péprunam jeawarmiayi. Tura nuí Rístranam Yus-shuaran wáinkiarmaiya, ni naari Timiutéu. Ni nukurínkia Israer-shuar Yus-shuarauiya. Tura ni aparínkia Kriaku áentsuyayi. 2 Tura Ristra péprunmaya Ikiuniu péprunmayasha Yus-shuar ármia nu, Timiutéu péñker wekaawai, tiarmiayi. 3 Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nuí pujuarmia nu yajauch enentáimprarain tusa tsupirmamtikiarmiayi. 4 Tura nuyá Papru Timiutéujaj ashí péprunam nuí sétur nuí sétur wéenak Jesusa akatramurisha Yus-shuaran wáinniusha Jerusarénum nuik jintintian umiktarum tusa ujarkutak wearmaiya. 5 Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenki wearmaiya.

Papru iimiarmia nu

6 Tura Yusa Wakaníkia Páprun Yus-Chichaman Asia nunkanam ujaktinian tsankatkachmaiya. Tuma asantai Pirijia nunkanam tura Karasea nunkanam airkutak, 7 Misia nunka jeatniunam jeawarmiayi. Túrunawar “Pitinia nunkanam wetai” tiarmiayi. Túrasha Yusa Wakaní nuisha wétinian suritkiarmiayi. 8 Tuma asantai Misia nunkanam menantki Truas péprunam pachiniawarmiayi. 9 Nuí jeawar Papru kashi iimiarmiayi. Masetúnia nunkanmaya áishman kan wajan wáinmaiya. Nu áishman Páprun chicharuk “Winitritia. Yáintkiamnium” tímaiya. 10 Nuyanka

tu iimiarmatai, wisha Páprujai wetai tusar iwiarnarmiaji. Tura Yus incha nú nunkanam ni chichame etserkat tusa ti nekas unturmakrin wéaji, tímiaji.

Jiripius Péprunam túrunamia nu

¹¹ Tura nuyanka kanunam enkemprar Truas péprunmaya jíinkir Samutrásia nunkanam jeamiaji. Tura kashin tsawar nuyanka katjarar Niápuris péprunam jeamiaji. ¹² Tura Niápurisnumia náwek Jiripiusnum jeamiaji. Nui Jiripius péprunmanka Rúmanmaya aents matsamsa ármiaji. Tura nú péprusha Masetúnia nunkanam nekas uunt pepruyayi. Tura nuisha seturmaji. ¹³ Nuyá sáwartin tsawarmatai pepru ikiukir entsá supichik wémiaji. Yus áujsatniun iruntrarmia nui pujusar, nuwa iruntrarmia nu Yus-Chicham ujakarmiaji. ¹⁴ Nui Tiatira péprunmaya nuwa, ni naari Ritia wáinkiamiaji. Niisha tarach yamakain péngeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha pénger anturkamiayi. Túman, Uunt Yus Papru chichaamun umirkat tusa ni enentáin takasmiayi. ¹⁵ Túruna nú nuwa níiniurijiai imianmiayi. Tura nuyasha chichaak “Yus-shuar nekas ajasai túrutkurmeka winia jearuí winitiarum” tímiaji. Tura nui jeawakrin setumtikrampramiaji.

¹⁶ Tura nuyá ukunam Yus aujsatai tusar wekaamar nuwach nekaamin-iwianch enkemtuamu inkiunmakmiaji. Nu nuwachikia misatkauyayi. Niisha nékamkui nérenniurisha ti kuitriniawarmiayi. ¹⁷ Tura nú nuwach incha Pápruncha pataaturmamiaji. Tura kakantar

untsumuk “Ju áishmansha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi.

¹⁸ Tura nú nuwächisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijiai tájame: jíinkitiá ni enentáiya” tímiayi. Tutai íwianchkia nú chichamaik jíinkimiayi.

¹⁹ Tura nuwächi nérenniurisha, íwianch jiiiki awematniun nekaawar, Páprun Sérasnasha kakerak achikar pepru uuntri ísarat tusar ajapén júkiarmiayi. ²⁰ Tura pepru úuntriin ejeniar tiarmiayi “Ju áishman Israer-shuar áiniawai. Tura in páchim enentáimtikramainiaji. ²¹ Tura iisha Rúmanmaya aents árin, ii túrachminian, iikia asumprachman jintintramainiaji” tiarmiayi.

²² Tura nuyanka ashí aents Páprun Sérasnasha kakerkarmiayi. Túramtai pepru uuntri chichainiak “Pushiri áitkiarum numijiai asutiátarum” tiarmiayi.

²³ Tura nuyá ti asutsua amikar sepunam enkeawarmiayi. Tura sepú-iinian chicharuk “Ti péñker iistá pisararain” tiarmiayi. ²⁴ Nu

chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. ²⁵ Tura kashi ajapén Papru Sérasjai Yusan áujainiak kantampriarmiayi. Tura chíkich enkeamussha nuna antúu pujuarmiayi.

²⁶ Tu pujuiniaj aya aneachma ti kakantar uurkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai enkekar jínkiamusha mash atiniakarmiayi. ²⁷ Túrunamtai sepú-iin shintiararmiayi. Tura wáitisha mash uranar

aan wáiniak, enkeamussha jiiniar shiákchariash tusa ni puniariniak ukuiniak máamattsa pujumiayi. ²⁸ Tura Papru untsuak “Amek yajauch awajmamsaip. Ashí pujuiniaji” tímiayi.

²⁹ Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuran̄ki jearmiayi. ³⁰ Tura aa j̄iki aniasmiayi “Uunta, ¿warí itiurkattaj uwemprataj tusana?” tímiayi. ³¹ Tutai niisha tiarmiayi “Uunt Jesukrístu nekas enentáimtustá. Túrakmeka amesha, tura áminiurmesha uwemprattarme” tiarmiayi. ³² Tura nuyá ashí ni jeen pujuarmia nunasha Yus-Chichaman ujakarmiayi. ³³ Tura tsawant iran̄kai sepú-iincha Páprun Sérasjai numpamnamur̄in nijiararmiayi. Túramtai nuyasha sepú-iincha nuar̄ijiai uchir̄ijiai imianiarmiayi. ³⁴ Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniur̄ijiai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. ³⁶ Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia péñkerak jíinkitiarum” tímiayi. ³⁷ Túrasha Papru suntaran chicharuk tímiayi “Warí, iisha Ruma aents árin̄in, niisha chichaman iwiartsuk ashí shuar íimiainiāin̄ asutiámamji. Túrawar sepunam enketmamji. Tura ¿urukamtai yamaikia uuk akuptamkataj tusa wakeruinia? Atsá. Antsu uuntcha niñki taar j̄iirmaktiai” tímiayi.

³⁸ Tutai suntarsha waketkiar nuna ujakarmiayi

pepru úuntrin. Tutai niisha ti ashankarmiayi Ruma aentsun nekaawar. ³⁹ Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nui Israer-shuara iruntai jee ámiayi. ² Tura Pápruka nuna tuke túrin asa nu jeanam wémiayi. Tura nuisha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusan jintintiarimiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarme” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjaisha tsaninkiarimiayi. Tura Kriaku aencha ti untsuri Yúsan umirkarmiayi. Tura nuwa penkeri armia nusha nútiksaran umikiarmiayi. ⁵ Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntrin suruktai tusar Jasunka jeen árenkarmiayi. ⁶ Túrasha Páprun

Sérasnasha awetrar, Jasun_{kan} tura chíkich Yus-shuarnasha achikiar japirkutak júkiarmiayi. Tura pepru úuntri_n juíniak tiarmiayi “Ju áishman_{sha} ashí nun_{kan}am charaatum ajá wekarmia nu yamaikia tímiajai tarutramarji. ⁷ Tura ju Jasun_n ni jeen itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. ⁸ Nu chichaman antukar, aents nui pujuarmia nu, úuntri_mmiak charaatum ajararmiayi. ⁹ Tura Jasun_n chíkich Yus-shuarjai Papru nekas awemattaji tusar, paij, kuit ikuuaji, tiarmiayi. Nuna takui pepru uuntri_n nin akupkarmiayi.

Piríanam

¹⁰ Nuínkia nú kashi Yus-shuar Páprun Sérasnasha Piría péprunam akupkarmiayi. Tura nui jeawar Israer-shuar iruntai jeanam wearmiayi. ¹¹ Piríanmaya aentska Tisarúnikianmaya áentsjaínkia nan_{ka}amas pen_{ker} enentáimkia áarmiayi. Tuke enentáijiai Yus-Chichaman ántiarmiayi. Túrawar tuke tsawant imia nin_kisha Papru tana nuna nekasashit tusar Yusa papir_n ii wearmiayi. ¹² Tuma ásar untsurí shuar Yus-shuar ajasarmiayi. Tura Kriaku aents nuwá pen_{ker}i armia nusha áishman_{sha} umikiarmiayi. ¹³ Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nui weriar charaatum awajiarmiayi. ¹⁴ Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujai nuin_n Piríanam juakarmiayi.

¹⁵ Tura Páprun nemariarmia nu Atenas péprunam nin ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nui nú péprunam ántar-yus ti írunkui Páprusha kúntuts enentáimmiayi.

¹⁷ Tuma asa Israer-shuar iruntai jeanam Israer-shuarjai tura chíkich aents Yúsán enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiayi.

¹⁸ Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamuriñ tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiai. Nui Páprun aniasarmiayi “Tisha ame yamaram támena nu nekaatai tusar wakeraji, tiarmiayi. ²⁰ Amesha nushaa chicham jintiniaitme. Túmaitkiui ju chichamsha warintuak tusar nekaatai tusar wakeraji” tiarmiayi.

²¹ (Atenasnumia aencha tura chíkich nunkanmaya shuar nui pujuarmia nusha aya yamaram chicham amia nunak ántiarmiayi. Tura aya nunak áujmatiarmai.) ²² Nuyanka Papru Ariupakunam ajapén wajaki tímiayi “Atenasnumia áishmantiram, wi nékajai, atumsha

atumi yusri ainia nuyá tsurakchamniaitrume, tímiayi. ²³ Kame wi nuik atumí yusri enentáimtutainiam íistaj tukaman nui jeachin iwiamun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume' tímiai.

²⁴ 'Nekaatarum, nu Uunt Yuska ashí nuñkan tura nui írunna nuna najanaiti. Tura Niisha nayaimpin nuñkancha nérenniurinti. Tura aents najanamu jeanam nú Yuska pujuchuiti.

²⁵ Niisha aents yáinkiat tusa atsumatsui. Warí, imia-nin̄ki Niisha ii iwiaakmarin, ii mayattairin̄cha tura ashí írunna nunasha súramtsujik, tímiayi. ²⁶ Nekaatarum. Nu numpanmayanak ashí áentsun najanamiayi ashí nuñkanam matsamsarat tusa. Tura Yuska ii tsawantrin̄ nekapmaiti; ii pujustinniasha nútiksan̄ nakakmiayi. ²⁷ Winia eátkar wáitkariat tusa Yus nuna túrayi. Túrasha Yus jeashtaka pujurtamtsuji, tímiayi. ²⁸ Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksan̄ atumí papí-aintri tíchamka "Ashí incha Yus najatmaitji." ²⁹ Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi. ³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk "Tunaaruminiā enentáimpratarum" túramji, tímiayi. ³¹ Yuska áishman̄kan anaikiaiti. Nú áishman̄ ashí aentsti, yáki pēn̄keran túriniait, yáki yajauchin̄ túriniait

núnaka nekarmattaji. Nú áishman Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Nin̄ki achikiuiti. Túrasa nekas anaikiajai tusa, tura ashí áentstiram nekaatarum tusa nú áishman kan jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikiar nin nemarsarmiayi. Nuisha Tiuníseu páchitkiauyayi. Niisha Ariupaku áentsuyayi. Tura nuyasha nuwa, ni naari Tamaris, tura chíkich aencha nútiksaran nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nuí Israer-shuaran ni naari Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujai uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nunkanmaiti. Nuí awemamu ásar Akira Kurintiunam nuik támiayi nuwe Pirisírajai. Tura Pápruka Akiran chichastaj tusa werimiayi. ³ Akirasha Páprusha mai juna takau ármiayi, tarach ti núparman jea najantain najanin ármiayi. Tuma asamtai Papru Akirai seturmiayi nu takat túrawartai tusa. ⁴ Tura tuke sáwartin Papru Israer-shuar iruntai jean wéuyayi. Nuisha Israer-aentsun

Kriaku-aentsnasha nútiksaran Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmena nu Jesusaiti” tímiayi. ⁶ Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuinkia ikiuajrume tusa, ni pushirin pear tímiayi “Atumek makuumarme. Tura wikia Yusai makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

⁷ Tura nuyanka Israer-shuar iruntai jeanmaya jiinki, Yusan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi. ⁸ Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuarijiai uchirijiaisha Yusan umirkamiayi. Tura chíkich aencha Kurintiunmaya armia nu nútiksaran Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesebran ipiatkamiayi. Chicharuk “Peñké ímatik awajtamsachartatui Wi ámijiai pujakuí. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

¹¹ Tura nui Kurintiu peprunam jimiara uwí ejesattuk Yus-Chichaman étseruk pujumiayi.

¹² Tura Kariun, Akaya nunka akupniuri anaikiamu ai, Israer-aents Páprun kajerarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³ Tu túrawar

akupniun chicharainiak “Ju áishman Yúsan umírkatniun Muisais akupkamia núnaka íkias ausháa jintíawai” tiarmiayi. ¹⁴ Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinkia, tura akupniun umirchakuinkia, tárumna nuna anturkaintjarme. ¹⁵ Túrasha aya chichamnak tura aya náariniak atumí uuntri akupkamia nunak tau asamtai, atumek nuámtak ístarum tájarme. Wikia nu chichamnum pachinkiatniun nakitiajai” tímiayi. ¹⁶ Taku aa jíikmiayi. ¹⁷ Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha íimmianuman. Túrasha akupin Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pirisírajai ni aishri Akirajai Senkrea péprunam wearmiayi. Nui Israer-shuar túrutain umíak Papru ni intiashin awampramiayi, nuik Yúsan tímiaj nuna yamáí umíajai tusa. Nuinkia kanunam enkemprarmiayi Siria nunkanam waketkitiai tusar. ¹⁹ Tura nuyá Ipiasiu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. ²⁰ Tura niisha Páprun juin pujustá tusar seawarmiayi. Túrasha támaítai, tujintiajai, tímiayi. ²¹ Nuyanka áujas ikiuak “Wisha Jerusarénum

námper átatna nuna pachiintiuktiniaitjai. Tura Yus akuptakuinkia atak tatajai atumin íistaj tusan” tímiayi. Tura kanunam enkemar Ipisiunmaya jíinkimiayi.

²² Nuyá Pápruka Sesaría péprunam jeá, nuyanka Jerusarénum wémiayi, Yus-shuaran nui áujsataj tusa. Tura nuyá Antiukíanam wémiayi. ²³ Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wémiayi. Tura weak Yus-shuar matsamarmia nuna chicharak ikiakáarmiayi.

²⁴ Tumáa pujai Arijiántria péprunmaya Israer-aents Apurus Ipisiu péprunam jeamiayi. Niisha Yusa yaunchu papirín ti péñker nekaamiayi. Et-serkatniuncha ti nékauyayi. ²⁵ Uunt Yus tímia nunasha unuimiátrauyayi. Tura tuke enentáijiai chichasmiayi. Jesusa túramurín péñker jintinni-uyayi. Túrasha aya Juan imiakratmanak nekaamiayi. ²⁶ Ju Apurus arantutsuk Israer-shuar irun-tai jeanam chichamiayi. Tura Pirisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintin-trarmiayi.

²⁷ Nuyá ukunam Apurus, Akaya nunkanam wétaj takui, Ipisiunmaya Yus-shuar yáinkiar papí áarar atakas akupkarmiayi. Nú áentsnum péñkerak jeat tusar túrawarmiayi. Tura Akayanam jeá, nú áentsun Yusa waitnenkratairijiai uwempraru ármia nuna ti yáinkiararmiayi. ²⁸ Tura Apurus Israer-aentsjai paant chichasmiayi. Túrasha Yusa Papirijiai, Jesussha nekas Yusa anaikiamurinti tusa paant jintíak nincha nupetkamiayi.

19

Papru Ipisiunam jeamiayi

¹ Tura Apuruska Kurintiunam pujái Pápruka náinniumaani wekaráktak, Ipisiunam jeamiayi. Tura nuísha Yus-shuaran wáinkiamiayi.

² Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarmea imianmiarum?” tímiayi.

Tutai niisha tiarmiayi “Juan jintintramamij nu iisha enentáimsar imianmij” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukurui winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

⁵ Nuna antukar niisha Uunt Jesusa náarin enentáimtusar ataksháa imianiarmiayi. ⁶ Tura Papru ni uwejejai nin antinmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmiayi. ⁷ Nusha tuse (12) áishman ármiai.

⁸ Tura nuísha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi.

⁹ Tura chíkichka ni enentáin ti ikiatsuárarmiayi.

Túrunawar umiktinian penké nakitiainia ásar aents ántamunam Yusa jintin penké yajauch chicharkarmiyi. Tuma asamtai Papru Yushuarnaka akanki yaruak Tiranu iskuirariin tuke tsawant Yus-Chichaman ujaarmiyi. ¹⁰ Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiyi. ¹¹ Tura aentsti túrachminian túrat tusa Yuska ni kakarmarin Páprun susamiayi. ¹² Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antinmiar pénker ajaarmiyi. Iwianchrukusha nuna antinmiar, íwianch jíinkimtai ankant ajaarmiyi.

¹³ Tura chíkich Israer-aents uwishin ármiai. Tura niisha chíkich chíkich péprunam wear iwianchrukun iwianchrin jírki akuptin ármiai. Tuma asa niisha Jesusa náarijiai iwianchin jíiktiai tusar, iwianchin chichartuiniak “Nu Jesus Papru ujaana nuna náarijiai jíinkitiarum tájarme” tiarmiyi. ¹⁴ Tura Israer Patri uuntri Esewia náartin, siati uchiri ármia nu, nuna túriarmiyi. ¹⁵ Túrasha Jesusa náarijiai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi. ¹⁶ Nuna tinia iwianchruku áishman tsékenki nú áishman kan kakaram katsumak nupetkarmiyi. Túram ti katsumam niisha misú tura numpamnawar jíinkiar pisararmiyi. ¹⁷ Nusha Ipisiu péprunam túrunamiayi. Túrunamtai Ipisiu péprunmaya Israer-shuarsha tura Israer-

shuarchasha nuna túrunamun nekaawar ti ashamkarmiayi. Tura Uunt Jesusa náarin shiir awajsarmiayi.

¹⁸ Túmainiai untsurí shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. ¹⁹ Tura untsurí uwishniumawarmia nu, wawekratai papí ármia nuna itiarmiayi. Itiar, júka iniaiyaji tusar, ashí íimiainiain áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi. ²⁰ Tu túrunamtai Uunt Yusa chichame pampanki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénnum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ní tsaniakmarin Masetúnia nunkanam emka akupkarmiayi. Timiutéun Erastujai akupkarmiayi. Tura ninkia Asia nunkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. ²⁴ Iis, nui Ipisiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajasmiayi. Tura chíkich áishman nú takatan takarmia nunasha ti kuítrintin awajsarmiayi. ²⁵ Timitriusha niijjai takarmia nuna ikiaanak, chikichnasha niijjai

métek-taku takarmia nunasha ikiaanank nijjai charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujai ti kuit achíatsjik. ²⁶ Tura atumsha ju Papru wáintrumna nu tura ántarmena nu chichaak “Ashí aents najanam yuska ántar áiniawai” tatsuk. Nuna tau asa, juí Ipisiunam, tura arant ashí Asia nunkanam, ní yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk. ²⁷ Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajiáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsummiarmiayi.

²⁹ Nuñkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemarín ármia nuna achikiar japirkutak iruntai jeanam júkiarmiayi. ³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nunkanmaya uuntri, Páprun amikri ásar, aínkia wayawain tusar chichaman akuptukarmiayi. ³² Túrasha irunar pujuarmia nu, páchim enentáimprar, chíkichka nusháa untsummiarmiayi. Tura chikichcha nútiksaran ausháa untsummiarmiayi. Tura chíkichka ti

untsurí, nekaachar “wariniak irunturara” tiarmiayi. ³³ Chíkich nui wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi. ³⁴ Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

³⁵ Ipisiu pepru papí-aintrisha áentsun itiat-mamtik tímiayi “Ipisiu shuártiram antuktarum. Ii uunt yusrí Tiana jee íistinia íichukaitiaji. Tura ni nakumkamurisha nayaimpinmaya iniarmania nusha íischatniukaitiaji. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. ³⁷ Ímiatarum. Ju áishman átum itiarumna nu, ii yúsrin yajauch chicharkacharai. Tura ni jeen yajauch awajsacharai. ³⁸ Wats, Timitriu tura niijiai takainiana nu tunáa túramun ujaktai tusar wakeruiniakka pepru penkerin werishtinkiait. Nuinkia máimtek iwiainiakartí. ³⁹ Tura chíkich chicham ákuinkia penker iruntrarum iwiatarum. ⁴⁰ Kame ju yamáí túrunamun nekaawar Rúmanmaya kapitíán “Ii uunt kapitíántri yajauch awajsatai tusarum túrachurmeash” turamchatjiash. Warí, niisha “¿Urukantai charaatum ajarum?” takuisha, áimkiatin penké tujinkiattaji” tímiayi. ⁴¹ Tura papí-aint nuna tuasua amik “Áukete. Wétarum”

tímiayi.

20

*Papru Masetúnia nunkanam Krisia
nunkanmasha wémiania nu*

¹ Charaatum ajasua amikiarmatai Papru Yus-shuaran untasuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. ² Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi. ³ Nui menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaani wetajai” tímiayi. ⁴ Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpimaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi. ⁵ Túrawar niisha emki wear Trúas péprunam jeawarmiayi. ⁶ Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiaji Trúasnum. Tura nuisha siati tsawant pujusarmiaji.

Trúas péprunam túrunamia nu

⁷ Tura tumintin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia

wétin asa chichaa-chichaakua kashi ajapén ejemi-
ayi. ⁸ Tura yakí menaintiu pátaranam, tesaamu
ámia nuí iruntrarmiaji. Nuísha ji ekemarma
untsurí irunmiayi. ⁹ Tura nuísha natsa Eutikiu,
áankamunam ayamas pujusmiayi. Tura Papru
ti esaram chichaakui nu nátsasha kari pujumiayi.
Tumáa pujus kanaki yakí pátanmaya akaiki ini-
aamiayi. Tura penké jakan júsararmiayi. ¹⁰ Tura Pa-
pru akaatuki tsuntsumprua miniakkamiayi. Tura
Yus-shuaran chicharainiak “Ashamkairap. Atak-
sha iwiaakui” tímiayi. ¹¹ Nuyá ataksha Papru
wakamiayi. Tura tantan puukar yurumáwarmatai,
tuke chichaa-chichaakua tsawantmarmiayi Pa-
pru. ¹² Eutikiuncha iwiaakun ni jeen júkiarmiayi.
Tura ashí aents shiir enentáimsarmiayi.

Miritiunam wearmiayi

¹³ Wats, Papru Asun péprunam nunkan we
jeatajtsa wakerimiayi. Tura incha, átumka
kanunam wétarum, turamkurin, iikia emkir
wémaji Asunnum. ¹⁴ Nuí Asunnum inkiunaikiar,
Páprusha kanunam enkemprantai, Mitiríniniam
jeamji. ¹⁵ Tura nuyá jíinkir, kashin tsawarar Sámus
péprunam jeamji. Tura nuyanka Trujiriunam
jear ayampramji. Nuyasha kashin tsawarar
Miritiunam jeamji. ¹⁶ Pápruka Jerusarénum
wari wétajtsa wakerimiayi, pintikiustís naartin
jístatin pachiinkiataj tusa. Tuma asamtai,
Asia nunkanam ti núkap pujustinian nakitiak
“Ipisiunam wéhattajai” tímai.

Papru Ipisiunmaya úuntrin áujsamiania nu

¹⁷ Túrasha Papru tuke Miritiunam pujus,
Ipisiunmaya Yus-shuara úuntrin winitiarum

tusa untsukarmiayi. ¹⁸ Ni taarmatai Papru tímiayi “Atumsha wi Asia nun_{kan}am pujusan itiura túraj nu nékarme. ¹⁹ Atum_{jai} tuke tsawant pujumaj nui, nan_{ka}amantuchu enentáimtumasan, úutchim winia Úuntrun takatr_{in} takasmiajai. Tura Israer-shuar yajauch awajtustinian wakerutainia_{in} tuke takasmiajai. ²⁰ Ashí pé_nker ana nu nekaatarum tusan miji|atrutsuk jintintiamjarme. Iruntramarmena nui tura an_kant an_kant atumí je_{en} pujumarmena nu_{isha} Yus-Chichaman ujakmajrume, tímiayi. ²¹ Tura Israer-shuarnasha Israer-shuarchancha nútiksanak, enentai yapajíárum Uunt Jesukrístu umirkatarum, tímiajrume. ²² Tura yamáí Jerusaré_nnum wéajai, Yusa Wakaní túrutkui. Nu_{isha} túrunatana nunasha nekamatsuk wéajai. ²³ Tura Yusa Wakaní iniakturkui juna nékajai, ashí pepru wi jeattajna nui enketátai tusar nákarainiawai. Tura ti wáitsatniun nekapsattajai. ²⁴ Kame wikia jákashtajash. Túrashá warí winia itiurtawa. Wikia Yusa jinti_{in} warasan wekasataj tusan wakerajai. Yusáí wea-wéakuan jáakun iniaisataj tajai. Tura nuyá takatan Uunt Jesus surusmia nuna pé_nker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ ‘Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrume. ²⁶⁻²⁷ Nekaatarum, ashí Yusa wakeramur_{in} wisha pen_{ké} úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia

penké makuumashtatjai. ²⁸ Tuma asamtai emka atumek ímiastarum. Túrarum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. ²⁹ Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. ³⁰ Túrasha nemartusarat tusar wakeruiniak atuminiñan wait chichaman unuikiartin wantinkiartatui. ³¹ Tuma asamtai yatsurtiram, aneartarum. Wisha menaintiú uwitin tsawaisha káshisha úutchim ankant ankant unuiniamajrumna nu kajinmatkiirap' tímiayi.

³² 'Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuarar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nui pachiinkiattarme. ³³ Wats, wisha chikichki shuara kuítrin wariríncha wakerutkachuitjai. ³⁴ Antsu winia uwejrujai takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. ³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. "Achiana nujainkia nankaamas, súana nuka shiir waraawai" tíchamka" tímiayi.

³⁶ Nuna tuasua amik Papru tikishmarmiayi. Tura ashí niijjai iruntrarmia nú shuar Yúsan

áujsarmiayi. ³⁷⁻³⁸ Tura Papru nuik chichaak
 “Atakka wáitkiashtatrume” tiniu asamtai, ti kúntuts
 pujuiniak, úutchim Páprun miniaksarmiayi.
 Túrawar kanunam ejeniarmiayi.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam
 enkempramji. Tura ínkiuasmak Kus péprunam
 jeamji. Tura kashin tsawarar Rútas péprunam
 jeamji. Tura nuyanka Patara péprunam jeamji.

² Tura nuí Pataranam pujusar, chíkich kanu
 Pinisia péprunam wea wáinkiamji. Túmakui nuí
 enkemprar wémaji. ³ Nuí wésar Chipri nuñkaka
 wáinkiamji. Chíprikia menanmaaní aa ikiuakur

Sírianam jeamji. Kánuka Tiru péprunam jeá
 pujustiniuyi, káarak núkap ikiuktin akui. Tuma
 asamtai iisha Tírunam jear kanunmaya jíinkir
 péprunam wayamji. ⁴ Nuí Yus-shuar wáinkiar
 nuín siati tsawant pujusmaji. Tura Yus-shuaran

Yusa Wakaní ujakam Páprun chicharainiak
 “Jerusarénumka wéchatniuitme” tiarmiayi.

⁵ Tura siati tsawant nankaasmatai jíinkimji.
 Ashí Yus-shuar ármia nu núwentuk uchirtiuk
 nemartamkamji, péprunam iniankatmaktiai
 tusar. Káanmatkanam jear tikishmarar Yus áujsamji.

⁶ Tura nu amikiar nuñkia áujnaisar ikiukiarmaji.
 Tura iikia kanunam enkemprakrin nínkia ni jeen
 waketkiarmiayi.

⁷ Iisha Tirunmaya entsak wea-wéakuar
 Turumáitianam nuín jíintramji. Tura nuí jearsha
 Yusai yachi ármia nu chichasar nuín chíkichkí

tsawant pujusmaji. ⁸ Kashin tsawarar nuyá jínkir nun_{kan} weri Sesaria péprunam jeamji. Nui Jiripi jeen jear pujusmaji. Jiripikia Yus-Chichaman etserniuyayi. Nuik Jerusaré_{num} siati áishman_{kan} Yusa takatr_{in} wáinkiarat tusar anaikiarmia nú Jiripiiti. ⁹ Jiripisha kuaru nawantr_{in} yarumkauyayi nuatnakchan. Niisha Yusa chichamen etserin ármiai. ¹⁰ Tura iisha Jiripi jeen wárum tsawantak pujarin Jutía nun_{kan}maya aents Yusa etserniur_i, Akapu náartin támiayi. ¹¹ Niisha taa Papru emenmamkar_{in} achikmiayi. Tura achik nin_{ki} ni nawen tura uwejéncha jin_{kiam}miami. Nuna tura tímiayi “Yusa Wakan_i tawai, juna emenmamka nérenniur_{in} Israer-aents jútikia jin_{kiá}war Israer-shuarchanum surukartatui, tawai” tímiayi. ¹² Iisha nu antukar Papru tímiayi “Jerusaré_{num}ka weep.” Sesarianmaya Yus-shuarsha nú_{nisa} Páprun tiarmiayi. ¹³ Tutai Papru tímiayi “¿Urukamtai úutkuram winia enentáirui kúntuts awajtarum? tímiayi. Wi Jesusna asamtai Jerusaré_{num} jin_{kiata}iniakuisha mántuiniakuisha ashamatsjai” tímiayi. ¹⁴ Tura iisha Papru emetatai tukamar tujinkiar “wats, nui_nkia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusaré_{num} wémaji. ¹⁶ Chíprinmaya yaunchu Yus-shuar Man-asun ni jeen Jerusaré_{num} takakuya nuna ikiat-mastinian wakerimiayi. Tuma asamtai Sesarian-maya ishichik Yus-shuar nemartamainiak Manasun_{nasha} júkiarmiayi.

Papru Jakupu jeen irastajtsa wémiania nu

17 Tura iisha Jerusarénnum jeawakrin, nuí warasar Yus-shuar ti shiir áujtamsarmiaji. 18 Tura kashin tsawar Papru ímiak Jakupu jeen wémiaji. Nuísha Yus-shuara uuntri matsamarmiaji. 19 Páprusha áujas amik, Israer-shuarchanum ni étsermajai Yus túramia nuna yámankamtaikniumia jukí chikichkimas ujakar ujakar awajsamiayi. 20 Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurí Yus-shuar ajasu áiniayat, “ashí Muisais akupkamia nu umiktiniaitji” tuiniawai. 21 Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nunkanam pujuinia nuna Muisaisa akupkamuri umirkashtin Pápruka jintintui, turamainiawai. Israer-shuarti tsupirnakitin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” 22 Wátsek, yatsuru, nuíñkia itiurmainkit. Ame tátintrumin aents nekaawarka jui kajertamainiak káutramkachartatuak. 23 Wats, antsu nuíñkia, ju túrata yatsuru. Jui kuatru áishman Yúsán yaunchu tiarmia nuna umiktasa pujuiniawai. 24 Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashin awampratin áchattawak. Nu áishmanka intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.

²⁵ Túrasha yatsuru, nekaata, Israer-shuarcha Yushuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtiniaitrume, tímiaji. Tura numpasha umarchatniuitrume, kajemtikramusha yúashtiniaitrume. Tura tsanirmashtiniaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiaamararmiayi, Muisais timia nútiksaran. Tura Yusan tiarmia nuna wárik umiktinian tura Muisais timia nuna Yus súatniun ujaktajtsa Papru Yusa Uunt Jeen wayamiayi.

²⁷ Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiarmai. Túrawar charaatum ajakiar Páprun achikiarmiayi. ²⁸ Achikiar unsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamái ju Jeencha yajauch awajturmaji” tiarmiayi.

²⁹ Jes, nuik Ipsiunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi.

³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epentrarmiayi. ³¹ Tura

maatai tusar matsamtuinia_i suntara kapitiántri Jerusarénnu_mia aents ashí charaatum ajainian antukmiayi. ³² Kapitiáncha ni suntarín tura sarjentuncha irur tseke weriarmiayi aents pujuarmia nui. Aencha suntaran tura kapitiánin wáinkiar, Páprun asutíniayat iniaisarmiayi. ³³ Kapitiánka Páprun jeari achikmiayi. Tura jimiará jirujai jínkiamiayi. Nuyasha aniasmiayi “¿Niisha yait? ¿Warinia túrait?” tímiayi. ³⁴ Túrasha aencha untsurí chichaman untsummiarmiayi. Túmainiakui kapitiáncha penké nekaachmiayi. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitiniam jeawar Páprun entsaki júkiarmiayi aents imiá kajerainia asamtai. ³⁶ Tura aencha ukunmaani pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitiánin Kriaku chichamjai chichaak “Wi ishichik chichasaintjame” tímiayi.

Tutai kapitián chichaak “Warí, ¿amesha Kriaku chicham chichastin nékamek? tímiayi. ³⁸ Nuínkia amesha ¿Ejiptunmaya shuárchakaitiam? ¿Nuik kua-tru mir (4000) aents, mankartin tutai atsamunam yaruakchamkam? ¿Kapitiánjai meset najanataj tusa túrachmakum?” tímiayi.

³⁹ Tutai Papru tímiayi “Núchaitjai. Antsu wikia Israer áentsuitjai. Sirisia nunkanam uunt pepru Tarsu náartin ana nui akiiniaitjai. Tura wait-neasam ju aents chichastin tsan_ukatrukta” tímiayi.

⁴⁰ Tura kapitián, ayu, tutai, Papru watainium wajas, mitiat pujustarum tusa uwején takuimi-ayi. Tura aents itiatkarmatai Israer-chichamjai chichasmiayi.

22

Papru áentsun timia nu

¹ Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kiishtumaktaj tusan titiatjana nu waitneasrum anturtuktarum” tímiayi. ² Tura Papru Israer chichaman chichaakui, aents nuna antukar nú nan̄kaamas itiatkarmiai. ³ Nuí Papru chichaak “Wikia Israer-shuaraitjai. Tarsu pepru Sirisia nun̄kanam ana nuí akiiniaitjai. Túmaitatnak juí Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamáí túrarmena nuna wisha nútiksanak Yusna ana nuna tuke enentáijjai wakerukuitjai. ⁴ Tura Jesusan umirkaru ármia nuna máataj tusan pataatukni wekaimiajai. Túran áishman̄kan nuwan̄cha achikian sepunam en̄keataj tusan túrimiajai. ⁵ Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna nin̄kia nékainiawai. Jesusan umirkarun achikia ikiaankan juí Jerusarénum asutniáwarat tusan werimjai’ tímiayi.

(Túramuri 9.1-19; 26.12-18)

⁶ ‘Tura wi jintiá wéai Tamaskunam jeastatuk ajasai nantu tutupin ai aya aneachma nayaimp-inmaya newaat wajantruntmiayi. ⁷ Túrunamtai wisha nunká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataaturam?” turutmiiai.

⁸ Takui wi aniasmajai “¿Amesha yáitiam, Uunta?”

Tutai “Wikia Nasarétnumiá Jesusaitjai. Ame pataaturmena núitjai” turutmiiai.

⁹ Wijiai pujuarmia nu, newaat wajantun wáinkiar ti ashamkarmai. Túrasha nínkia túrutun antukcharmai. ¹⁰ Tura wi tímiajai “¿Nuinikia, Uunta, warí itiurkattaj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiiai, tímiayi. ¹¹ Kame wikia nú newaat ajakun íisan jiiiru kusurmai. Tuma asamtai winia tsaniakmar enkeki jurukiar Tamaskunam ejetiarmai’ tímiayi.

¹² Papru tuke aujmatki wéawai. ‘Tura nuí Tamaskunam áishman Ananías pujumai. Niisha Yúsan aneak, Muisais akupkamia nuna umirkauyi. Tura nú péprunmaya Israer-shuar ármia nu nin pénker enentáimtiarmiai. ¹³ Nú Ananías winia íirsataj tusa támai. Taa turutmai “Yatsuru Sauru, pénker iimtia.” Túrutkui nú chichamaik pénker íimmiajai. Túrunan Ananíasnasha wáinkiamjai. ¹⁴ Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarincha nuna, íisat tusa, winia chichampruncha antukat tusa ámin yaunchu Yus anaitiamkaiti. ¹⁵ Amesha Papru, Yusna ana nu íisumna nusha antukumna

nusha ashí aents ujakartatme. ¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ “Tura Jerusaréñnum waketkin Yusa Uunt Jeen wémajai Yúsan áujsataj tusan. Nuí íimiarmajai. ¹⁸ Nuí Jesus chichartak “Juí Jerusaréñnum Wíi túramur etserkattamna nuna antukchartatui. Tuma asamtai warí jínkim wetá” turutmai.’

¹⁹ “Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí matsatun achikian awatin sepunam enkeawarmia nuna nékainiawai. ²⁰ Tura nuyá Áminiu etserniun Estepañkan máiniakuisha wisha wajamjai. Túruiniakui, “pénkeraiti” tímiajai. Nú arantcha ni pushirín írsamjai” tímiajai.’

²¹ “Túrasha Uunt Jesus winia turutmai “Wetá. Israer-shuarcha matsatainia nuí akupkatjame” turutmai” tímiayi Papru.

Suntara kapitíántriñ túrunamia nu

²² Nuí matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi.

²³ Tura aentska Paprun kajerainiak, ti untsumainiak pushirín tujaat ajapawar nunkancha nan kimkiamaiakia ajararmiayi. ²⁴ Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. ²⁵ Tura Páprun asutiátai tusar jin kiárar awajsam Pápruka kapitíánin chicharuk

“¿Rúmanmaya aents áyatik asutiámniakait, ni túramurí nekartsuk?” tímiayi.

²⁶ Nuna táman antuk kapitiáncha uunt kapitiánin ujaktaj tusa werí chichaak “Maaj, túrataj tamena nu anearta. Ju áishman Rúmanam pachitkaiti” tímiayi.

²⁷ Nuna antuk uunt kapitián Páprun werí aniasmiayi “¿Amesha nekasmek Rumanam pachitkaitiam?” tímiayi.
Tutai Papru “Ee” tímiayi.

²⁸ Tutai “Wikia ti kuítian akikmakmiajai Rúmanam pachiinkiatniun” uunt kapitián tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiniaitjai” tímiayi.

²⁹ Nuna takui Páprun asutiátaj tiarmia nuna wárik iniaisar jíníar wearmiayi. Tura imia uunt kapitiáncha Rúmanam pachitkian jin_kiá asa ashamkamiayi.

³⁰ Tuma asa kashin tsawar uunt kapitián, urukamtaik Páprun imiá kajerainia, nekaataj tusa wakerak Paprun werí jin_kiámun atirmiayi. Tura Israer-patrí uuntrín chíkich naamka armia nújaisha ikiaankamiayi. Tura nuínkia ni matsatmanum Páprun itiar ajapén awajsamiayi.

23

Israer-aentsu Úuntrín Papru timiania nu

¹ Papru Israer-patrí naamkarín úmamkes iis “Wíi shuartiram antuktarum. Úchichik tuke yamaisha Yus íimmianum péñker wekainuitjai” tímiayi.

² Papru nuna takui Israer-patri uuntri Ananías, ni suntarín Papruí ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuĩnkia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nuĩ wajarmia nu Páprun tiarmiayi “¿Maaj, amesha Patri uuntri imiá yajauchisha chichaream?”

⁵ Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tícháajai. Kame wisha nékajai, Yus-Chichamnum tawai “Atumí uuntri yajauch chicharkairap” tawai” tímiayi.

⁶⁻⁸ Israer-aentsu úuntriya jimiará írutka ármiai. Satuséu aents tura nuyá Paríséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarisha aentsu wakanísha tura iwianchcha atsawai, tiniu ármiai. Antsu Paríséu aentska, nuka ashí awai, tiniu ármiai. Nuna nekáa Papru kakantar chichaak “Wikia Paríséu áentsuitjai. Wíi shuarsha Paríséu áiniawai. Wikia ashí shuar jakamunmaya ukunam nantaktin átatui tu jintiamun, nekaatai tusar itiariarmiayi” tímiayi. Tura Papru nuna takui Paríséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi.

⁹ Nuĩnkia ashí aents charaatum ajararmiayi. Tura Israer-shuara jintinniuri Paríséunam írutka armia

nu wajakiar tiarmiayi “Ju áishman tunaan penké túrichuiti. Yusa suntari chíkich wakancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntara kapitíántri Páprun achiarchartimpiash tusa suntaran untuk, “Jiiktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntri mesekra ipiatuk “Kakaram ajasta, Papru. Ju Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yuminkramu atai” tiarmiayi. ¹³ Nuna tiarmia nuka kuarenta (40) nankaamas ármiayi. ¹⁴ Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yuminkramu atai” taji. ¹⁵ Tuma asamtai ashí Israer-patri naamkarijjai suntara kapitíántri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar ninkia táatsain náaktatji” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi. ¹⁷ Tuma asamtai Pápruka suntara kapitíántrin untuk “Ju uchi uunt kapitíánnium jukitia. Niisha chichaman takakui” tímiayi.

18 Kapitiáncha uchin uunt kapitiánnium ejé tímiayi “Papru enkeamu pujana nu winia untsurak “Ju uchi uunt kapitiánnium jukitia. Chichaman takakui” túrutui” tímiayi.

19 Uunt kapitiáncha nú uchin enkeki arantach jukí chicharuk “¿Warí turuttiaj tame?” tímiayi.

20 Tutai uchi tímiayi “Israer-aents Páprun chichaman jurusarai. “Papru túramurj ti paant nekaatai tusar kashin Israer-shuara uuntriin ejetarum” turamartatui. 21 Tura amesha nuna takui anturkaip. Kuarenta (40) nan̄kaamas jintiá akirtua pujurainiawai. Tura “Papru máachkurkia yurumsuk tura úmutsuk matsamsattaji” tuiniawai. Tuma asamtai yamaisha ámin titi tusa nákarmainiawai” tímiayi uchi.

22 Tura uunt kapitiáncha uchin chicharuk “Ame túrutmena nu chíkich aents pen̄ké ujakaraip’ tímiayi. Nuna tj, uchin akupkamiayi.

Akupin Piriksaj ejetiarmiania nu

23 Nuyanka uunt kapitiáncha chíkich kapitiánin jímíaran itiá chichaak “Urum, kashi ajapén̄ ajas-tatuk aj, untsurj suntar ikiaankarta. Jimiará sián̄ (200) aya náwek, setenta (70) kawainium eketka, nuyá chíkich jimiara sián̄ (200) nan̄kijiaín̄ Sesaria nun̄kanam wétin iwiarata. 24 Páprusha kawainium ekemkatin iwiarturta. Túrarum pen̄kerak ejetarum akupin Piriksaj” tímiayi. 25 Tura niijiaj ju chichaman áatrar akuptukmiayi:

26 “Ti pen̄ker akupin Píriks, wikia Krautiu Rísias ju papin áatjame. 27 Israer-aents ju áishman̄kan maatai tusar wakeruiniak achikiarmiayi. Tura niisha Rúmanmaya áentsuitkui wikia

nuna nekaan suntarjai werin jukimjai.

²⁸ Wikia ¿urukamtaik achikiaruit? tusan Israer-patri naamkarin jukimjai nin.

²⁹ Páprunka ii uuntri akupkamurin umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi.

³⁰ Tura wisha Israer-aents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksai werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiántri tímia nútiksaran Páprun kashi júkiarmiayi Antipatris péprunam. ³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi. ³³ Sesaria péprunam jeawar papin Piriksan súsararmiayi. Tura Pápruncha nuí ejeniarmiayi.

³⁴ Akupniusha papí aujsua amik Páprun aniasmiayi “Amesha, ¿tuí akiiniaitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiayi, suntar ísarat tusa.

24

Papru Píriksjai áujmatsamiania nu

¹ Tura senku tsawant nan̄kaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujaj táarmiayi. Ju aents Páprun kajerainia ásar akupniunam wearmiayi. ² Nui Páprun itiarmatai Térturu chichatan juármiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. ³ Tuma asakmin iisha ashí matsatmanum tuke tsawant ti shiir yuminsamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵ Ju áishman Papru, sun̄kura utsukratniua núniniaiti. Niisha ashí nun̄kanam mesetan najanatniun Israer áentsun ikiakáiniaiti. Tura Jesusa aentsr̄i, Nasarénu tuinia nuna úuntrinti. ⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátai tusar wakerimji. ⁷ Túrarin nuyanka kapitián Rísias taa tapit achik jurutramkimijai. ⁸ Tura atumek akupin Piriksaj werum nui aujmatkatarum, turamaji, tímiayi. Tuma asamtai amesha Píriks, Papru aniasta. Nuin̄kia ii tájinia nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejaj, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniur̄i ti untsur̄i uwitin pujusuitme. Tuma asamtai nuikia shiir enentáimsan páchitsuk chichastatjai. ¹¹ Wats,

wi túramur nekartuata. Yúsan áujsataj tusan Jerusarénnu wi wémajna nu tuse (12) tsawant nan̄kaamasai. ¹² Nuisha yajauch áujmatki weai wáitkiacharmai. Yusa Uunt Jeencha tura Israer-shuara aujtai jeencha tura pepru jíntianmasha áentsnum charáa charáa ajá wekaai pen̄ké wáitkiacharmai, tímiayi. ¹³ Ju aents jui matsatainia nu wíniaka pen̄ké turutchamnia áiniawai. ¹⁴ Túrasha juna paant ujaajme. Jesus yamarman jintíana nuna umíajai. Kame Israer-aentska wáitaiiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai. ¹⁵ Tura jakaasha nantaktin átatui, tajai. Warí, péñker aents nútiksán yajauch aencha nantakiartatui imia Israer-shuar tuiniatsuk. Tura wisha nútiksának túrunatniuiti tajai. ¹⁶ Tura wisha tiniu asan, wikia winia enentáirui Yus ímmianum makuumatsuk wekasataj tajai. Tura áentsnumsha nútiksának pen̄ké makuumatsuk wekaajai' tímiayi.

¹⁷ 'Tura, uunta, untsurí uwitin chíkich chíkich nun̄kanam wekaasuan amikian winia shuarui támajai. Kuítrinchán kuítian susataj tusan tura Yusa kuítríncha nin susataj tusan támajai. ¹⁸ Túran wisha, Muisais jintinmia nútiksának nijiaamaran, Yusa Uunt Jeen pujumiajai. Untsurí aents charaatum ajainiasha atsumiayi. Nui wiki pujái Ásianmaya Israer-aents wáitkiarmiayi. ¹⁹ Tura wi yajauch túraitkuíñkia winia wáitkiarainia nu táchatniukait ámin ujatmaktasa. ²⁰ Túrachkuíñkia jui pujuinia nu, Israer-patri

naamkari matsatmanum wi pujumajna nui yajauch túramun nékainiakka turutiarti. ²¹ Kame, ““jakamunmaya nantakminiaiti” tau asantai makuurtiajtsarum pujarme” matsatmanum tímiáj nujai turutchartimpiash. Nú arantka yajauch túramun penké nekartuacharmaj” tímiayi Papru.

²² Táman antuk Píriks, Kristu shuari túramun paant nekáa, áanik iniaisamiayi. “Antsu kapitíán Risias támatai nuinikia nu chichaman nekaatjai” tímiayi. ²³ Tura nuyá suntara kapitíántrín chichaak “Ju Pápruka tuke emetnati. Tura ishichkikia ankant apujtsatarum. Tura nuyá ni amikri taa yáintaj takui suritkiairap” tímiayi.

²⁴ Tura nuyá chíkich tsawantaj ataksha Píriks ni nuwejaj Tursirajaj támiayi. Núwenka Israer-shuarauyayi. Pírikska “Papru itiatarum’ tímiayi. Papru Jesukristunún étserkui antimiayi. ²⁵ Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi.

²⁶ Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa. ²⁷ Tura nuyanka jimiará uwí nankaasmatai Píriks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Pírikska, Israer-aents pénger enentáimtursarat tusa wakerak, Páprun sepunam tuke ikiukmiayi.

25

Papru Jístujaj áujmatsamiania nu

¹ Jístusha akupkatin takatan nan̄kaamataj tusa Sesaria péprunam támiayi. Tura menaintiú tsawant nan̄kaamasmatai nuyá we Jerusarénn̄num jeamiayi. ² Nuisha Israer-patri uuntri tura Israer-aentsu pen̄kerisha Páprun tsanumprurtai tusar Jístun weriarmiayi. ³ Tura tiarmiayi “Waitneasam Páprusha Jerusarénn̄num akupkata” tiarmiayi. Jintia maatai tusar wakeruiniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam en̄keamu pujawai. Tura wikia nūi wárik waketkittiajai” tímiayi. ⁵ Nuyá nin tímiayi “Atumsha pen̄keri árumna nu, wijiai Sesarianam wétiniaitrume. Tura nú áishman̄ka tunaarī ákuin̄kia nuisha títiniaitrume” tímiayi.

⁶ Jístuka Jerusarénn̄num ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nūi jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayam̄tai, Israer-aents Jerusarénn̄numia taarmia nu káunkarmiayi. Túrawar ti nukap chichainiak “Tunáa túrait̄i Pápruka” tu tiarmiayi. Túrusha pen̄ké uyumamtikiacharmiayi.

⁸ Pápruka chichamprumak tímiayi “Wisha tunaan pen̄ké túrachuitjai. Israera uuntri áarmarin̄cha umirkaruitjai. Tura Yusa Uunt Jeen̄cha yajauch awajsachuitjai. Tura uunt kapitianiasha yajauch pen̄ké chicharkachuitjai” tímiayi.

⁹ Jístuka Israer-aents pen̄ker enentáimtursarat tusa wakerak, Páprun tímiayi “Wakerakmin̄kia

Jerusarénnu wemí. Wisha nuí ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. ¹¹ Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuinkia wíniaka Israer-shuarnum surunkachminiaitjai tajai. Tuma asamtai seajme, wíi túramun uunt akupin Sésar nekartuati” tímiayi.

¹² Tutai, nuyá ni írutramurijiai chichasua amik, Jistu Páprun tímiayi “Uunt akupniui wétaj tusam seame. Tuma asamtai nuí wétatme” tímiayi.

Papru uunt akupniujai áujmatsamiania nu

¹³ Tura ishichik tsawant nankaamasmatai akupin Akripia ni nuwejai Pírinísejai Jístun áújsataj tusa Sesarianam wearmiayi. ¹⁴ Tura untsuri tsawant pujusarmiai. Tura nuí pujuiniaí Jístuka Papru túrunamun akupniun ujaak tímiayi “Juí áishman pujawai. Píriks nin achik enkea ikiukmiayi, tímiayi. ¹⁵ Kame wikia Jerusarénnu pujái Israer-patri uuntri tura Israer-aentsu úuntri sha, Papru yajauchin túraiti tusar káutrukarmiai, tímiayi. Mantamnati tusam akupkata, tu seattiar miayi. ¹⁶ Takui wi tímiajai “Iisha Rúmanmaya áentstikia chí cham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsaiñ mantamnati tusar akupeatsji iisha” tímiajai. ¹⁷ Tiniu asan, táarmatai, wikia ná katsuk kashin tsawaran akupin

pujutainium pujusan, Papru itiatarum tusan akupkamjai. ¹⁸ Tura Páprun tsanumprurtai tusar taar chichainiaksha, wi enentáimmiajna núnaka tícharmiayi. ¹⁹ Antsu áyatik Yus umirkar túmatairín Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi. ²⁰ Tura wikia nú chichaman túratniun nékachu asan, Páprun aniasmajai “¿Amesha Jerusarénnun wétaj tusam wakeramek? Nui nu chichaman nekartamawarti” tímiajai. ²¹ Túrasa “Atsá. Juin pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

²² Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”.

²³ Tura kashin tsawar Akripia Pirinísejai taar, iwiaa-iwiarmamu ajas wayawarmiayi. Suntara úuntrijiai tura nú péprunmaya úuntrijiai wayawarmiayi. Tura nui Jistu, “Papru itiatarum” tímiayi.

²⁴ Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents Jerusarénnunsha tura jui Sesarianmasha ju áishman kan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. ²⁵ Túrasa wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai.

²⁶ Tura wariniak uunt akupniun áatrataj nuna

nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. ²⁷ Warí wisha, ni yajauch túramurin áattsuk, uunt akupniunam akupkashtiniaitjai” tímiayi.

26

Papru Akripiaí chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairin ujakmiania nu

⁴ ‘Wi úchichik winia nunkarui tura Jerusarénumsha pujusan wi túramajna nuna ashí wíi aents Israer ainia nu nékainiawai. ⁵ Paríséu ajasan, ni akupeamurin itiurchat ain ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. ⁶ Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷ Tura ashí mash Israer-shuarti, tuse (12) aents matsatka ájnia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkuri,

tsawaisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia. ⁸ Warí, atumsha “Yus jakancha iniantkimniaiti” tátsurmek’ tímiayi.

⁹ ‘Tura wisha yáunchuka Nasarénumia Jesusnan umirkaruka kajerkatniuiti, tu enentáimniuyajai. ¹⁰ Tura Jerusarénnum Yus-shuar ármia nuna kajerkarmiajajai. Israer-patri uuntri chichamejajai untsurí áentsun Jesusnan umirkarmia nuna sepunam enkeamiajajai. Tura nú shuaran máiniakuisha wikia pénkeraiti tu wémiajajai. ¹¹ Tura Israer-shuara iruntai jeen wayan ti asutiármiajajai, Jesusnan umirkatniun iniaisarát tusan. Tura imiá kajerkaran chíkich nunkanmasha pataatu wearmiajajai achiktaj tusan’ tímiayi.

Tamasku jintianam túrunamun ujakmiania nu
(Túramuri 9.1-19; 22.6-16)

¹² ‘Tura Israer-patri uuntri tsankatrulkmatai, papin ni surusarmia nujaj, Tamasku péprunam wétaj tusan jíinkimiajajai. ¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujaj nankaamas etsantrutramiayi. Tura wijjaj wearmia nunasha núnisaran etsantrurarmiayi. ¹⁴ Tura túrunamtai ashí nunká tepetar wáinkiarmiajajai. Wiki Israer-chichamjajai túrutun antukmajajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuna núnismek. Wíi aents kajera asam túruname” turutmai.’

¹⁵ ‘Túrutkui wisha “¿Amesha yáitiam, Uunta?” tímiajajai.

Tutai Uunt turutmai “Wisha Jesusaitjai, ame pataatamna núitjai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. ¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. ¹⁸ Péñker jintintiatata tusan akupeajme. Kame aencha kiritniumiá jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarín tsankurattajai. Nuna túran Yusna ajasaru áiniana nujai apujsattajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹ ‘Tuma asamtai, uunt Akripia, Uunt Jesus nayaimpinmaya wantintiurak turutmia nuna umirkataj tusan pujajai. ²⁰ Enentai yapajiáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusaréñnumián, Jutía nuñkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran. ²¹ Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha

ujainiajai. Tura Muisaishsha, Yúsnan etserniusha tiarmia nunak étsereajai. Nú arantka tátsujai.
 23 Krístuka wáitsatniuyayi, tura jakasha émak nantaktiniuyayi, ii uuntri tiniu ármiai. Tura Krístuka nantaki Yusa chichamen íi áentsun tura Israer-shuarchancha nútiksā ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

Papru Akripian Yus-shuar awajsataj tusa wak-erimiania nu

24 Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

25 Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. 26 Wi tájana nuna, uunt Akripia jui pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

27 Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

28 Takui Akripia chichaak “Maaj, ishichik awaj-tame Papru, Yus-shuar ajastin” tímiayi.

29 Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijjai métek ajasúk tusan wakerajai. Tura antsu wia núnisan jinkiámua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapitiáncha, Pirinísesha, tura nui ashí pujuarmia nu wajakiarmiayi. ³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

³² Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitiántrijiai nenakar akupkarmiayi. Nú kapitiáni naari Júriuiti. ² Tura Atramitiunmaya kanu Asia nunkanam pepru ármia nui wétasa pujumia nu enkemprarmiayi. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³ Nui enkemprar kashin tsawarar Sitiun péprunam jeamiai. Nui jeawakrin kapitián Juriu, Páprun waitnentak tímiayi “Ame amikrumiin wetá. Au íirmasarti” tímiayi. ⁴ Tura Sitiunnumia jínkir, kanujai wesar nase tukumpramprakrin Chipri núnkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam

jeamiaji. Nuka Risia nun_ukanmaiti. ⁶ Nui_u jear nú kanu ikiukmiaji tura chíkich kanu Arijiántrianmaya taa Itiaria nun_ukanam wétasa pujumiayi. Nú kanunam suntara kapitíántri, en_ukempratarum, turammiaji. ⁷ Tura untsurí tsawant yáitmataik we-wémiaji tura ti wiántkar Nítiunam jeastatuk ajasmiaji. Tura nuísha nase tuke tukumkarta asamtai Sarmun_u nun_ukanam ayámchik nan_ukaamakir, Kritia nun_ukanam áawinini ayámchik wémiaji. ⁸ Tura Kritia nun_ukanam ayámchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. ⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. ¹⁰ Tura Papru chicharuk “Amikru antuktarum. Wi nékajai, yamaí wéakrikia ti tsúumainti. Kanusha tura káarak kanunam en_uketainia nusha men_ukarattawai. Tura iisha núnisrik kajin_uchatjiash” tímiayi. ¹¹ Suntara kapitíántrin_ukia Páprunka anturtsuk, kanú wianniur_un kapitíántrin_ucha tura kanú kapitíántrin_ucha chichamen_u anturkarmiaji. ¹² Tura nui_u Shiir Pujutai tutainium yumitin pujustin pé_unkerchaitkui “Nuín_ukia juyán_uka wéartai. Pinise péprunam jeamainchuashit” ashí tiarmiayi. Nú péprusha Kritia nun_ukanam nayaants ayámach pujawai. Nú péprunam yumitin pujustinian wakeriarmiayi, arakia nun_ukaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nun_ukaania tápiriri ajakui, ii wétin yamaikia pé_unkeraiti, tu

enentáimsarmiaiyi. Túmakui kanu emetai jiru júusar jíinkir Krítianam ayamchik wearmiaji. ¹⁴ Túrasha árusan arakiá kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. ¹⁶ Tura Kritia nunkanam áawinini nankaamakur nuinkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji. ¹⁷ Tura enkerar chapikjai uunt kanun jinkiáarmiaiyi wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiaiyi. Nu tarach nase útsuktin tusar nenarma ármiaiyi. Túrawar áyatik nase juramkitiai, tiarmiaiyi. ¹⁸ Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiaiyi. ¹⁹ Menaintiú tsawant nankaamasmatai iisha ii uwejéjain kanunam káarak iruniarmia nusha entsá utsan karmiaji. ²⁰ Tura untsurí tsawant tsawai sha etsantrachmiayi tura káshisha yaasha tsaparcharmiaiyi. Tura nasesha ti kakantar tukumpramkurin “Yamaikia uwempratin atsawai” tiarmiaji. ²¹ Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayanka jíintsuk anturtukuitkiurminkia yamá ju itiurchatnum pujutsuk tura emenkatmatsuk pujuajai’ tímiayi.’

²²⁻²⁴ ‘Yamá kashi winia Yusru suntari nayaimp-inmaya wantintiyurkayi. Nú Yúsan umirkaitjiana nu akupturkayi. Tura nu taruti “Ashamkaipia Pa-

pru, turutui. Amesha Ruma péprunam uunt akupniunam jeattame. Tura chikichnasha ámi^jiaⁱ kanunam enketainia ásarmatai uwempratniun Yus tsan^katkarai” turutui. Tuma asamtai, amikru, shiir enentáimsatarum. Atumsha mash uwempratarme. Tú^rasha kánuka mesertatui. ²⁵ Wis^ha winia Yú^srun nekas enentáimtajai. Yusa suntari^j turutainia nuna nekas tu túrunattawai, tajai. Tuma asamtai kak^artarum. ²⁶ Tura chí^hchimisha nun^ka uchich pú^jakmanum nui^j patatmittia^ji” tí^mia^yi.

²⁷ Ayu, katurse (14) tsawant nan^kaamasmatai nú kashi Atria nayaantsanam jeamia^ji. Nui nase nán^kkamas juram wémia^ji. Nuy^aan^ka kashⁱ ajapén^j wiantin armia nu nun^ka ámunam jeateman nekaawarmia^yi. ²⁸ Tura urutmá kúnakit tusa nekapmami^yi. Túram tráinta sais (36) mítruuyai. Nuyasha ékemsan^j ataksha nekapmami^yi. Nuin^kia painti siati (27) mítru nekapmami^yi. Tuma asa nun^ká anumsatuk ajasun nekaawarmia^yi. ²⁹ Tura kayanam ijiuk^ai tusar ashamainiak kuatru jirun kijinian chapik^jai kanú sen^karin jin^kiáwar entsá ajun^kkarmia^yi. Kijin asamtai, inít tepeámtai nase juramkichmi tusar túrawarmia^yi. Tura wake mesekar, tsaw^arti tusar matsamarmia^yi.

³⁰ Tura matsatainia^j wiantin armia nu, iikia uchich kanunam en^kkemprar pisarchatjiash tu enentáimsarmia^yi. Túmainiak kanú nujinia chí^hkich jirun ajun^tai tawa nútik^saran^j uchich kanun ajun^tai tusar pujuarmia^yi. ³¹ Tura tuma wáⁱniak Papru suntara kapitián^trin tura ni suntarⁱncha ujakmia^yi. “Ausha uunt kanunman^j enketainiachkuin^kia atumsha

uwemprashtatrumé” tímiayi. ³² Tutai suntarsha uchich kanú chapikrín tsupirkar entsá ajun̄karmiayi.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yumĩnsamiayi ashí íimmianum̄an̄. Tura puuk yuamiayi. ³⁶ Tura apatkun yuan wáinkiar, ashí aents shiir enentáĩmsar yurumáwarmiayi. ³⁷ Nusha ashí aents irurmaka jimiara sīan̄ nuyá ataksha setenta sais (276) ármiai. ³⁸ Yurumáwar ejemakar, yurumkanka entsá utsan̄karmiayi, uunt kanu wampú ajasat tusar.

Kanu pen̄ké mesermiania nu

³⁹ Tura tsawarmatai wiantin armia nu, nun̄kan nekaacharmiayi. Túrasha én̄kentamunam káanmatak aan wáinkiar “Ai kanu anuntai” tiarmiayi. ⁴⁰ Nuyá jiru entsá ajun̄man chapikrín tsupirkar entsá ikiukiarmiayi. Tura kanait jin̄kiárma ármia nuna chapikrín tsupirkarmiayi. Tura tarach kanú nujīin amia nuna nenakarmiayi. Túram kanu káanmatkanam anumsatuk ajasmiai. ⁴¹ Tura wainchi jím̄iar ámunam jeá kanu entsá wayá tepeamiayi. Tura kanú sen̄karīnkia chíchimi yakí takuir ajíamu asa kupintramiayi. ⁴² Suntarsha, achik júamu armia nú shuaran máataj tusa

wakeriarmiayi, yukuak pisararain tusar.
⁴³ Tura kapitiáncha Páprun uwentikrataj tau
 asa nuna túratniun tsankatkachmiayi. Antsu
 chichaak “Emka yukuaktin nékarmena nu
 yukuakrum péemkatarum, tímiayi. ⁴⁴ Nuyá
 chíkichkia kanunmaya numi, kame nánkamas
 numi achikrum awamkarum péemkatarum”
 tímiayi. Tu túrawar ashí iwiaakuk jínintrarmiayi.

28

Marta nunkanam túrunamia nu

¹ Tura ashí iwiaakuk jínintrar, nu nunka Marta
 naartin nekaamiaji. ² Tura nu matsamin armia
 nu, shiir awajtamsarmiaji. Tuma asamtai iisha
 tsetsema asakrin, tura yumisha yútakui, uunt
 jinia ikiapáarmiayi. Tura “anamaitiarum”
 turammaji. ³ Pápruka jinia kukarun ikiaanak
 jinium pataamiayi. Túmawai napi tsuéran
 ashamak jiinki, Papru uwejen nemaramiayi.
⁴ Tura nú nunkanmaya aents, Papru uwejen
 napi nemaran wáinkiar “Ju áishmansha shuáran
 majchuashit, tiarmiayi. Nayaantsanmaya
 uwempraitiatan ni yusrí iwiaaku átinian
 suritiawai” tiarmiayi. ⁵ Páprusha ni uwejen pear
 napin jinium awanmiayi. Tura penkesha yajauch
 ajaschamiayi. ⁶ Tura niisha eáchatpiash tusar ii
 pujuarmiayi. “Túmatskesha jaka inianchatpiash”
 tiarmiayi. Túrasha ti núkap pujussha penké
 najaweachmiayi. Túrunamtai, nuínkia nusháa
 enentáimprar “Pápruka yúschashit” tiarmiayi.

⁷ Nú nunkanam aentsu penkeri ámiayi ni naari
 Pupriu. Nú Pupriu ni jeen in itiaarmamiaji. Tura

menaintiú tsawant yurumkancha suramsarmiaji.
⁸ Tura nui pujarin Pupriu aparí tsuer, numpajai
 ijiarki jáamiayi. Túmakui Papru werí iyumiayi.
 Tura Yúsan áujtus amik uwején nin awantkami-
 ayi. Túram péñker ajasmiayi. ⁹ Nu túramun
 nekaawar, nú nunkanmaya aents jaa armia nu
 tariar, niisha péñker ajasarmiaji. ¹⁰ Túram incha
 ti shiir enentáimturmasar núkap ajampramsamiaji.
 Túram ukunam ii wétin jeamtai ashí ii atsumamun
 suramsarmiaji.

Rúmanam jeawarmiania nu

¹¹ Ii wétsuk nú nunkanam menaintiú nantu
 pujusmiaji. Tura nuyá chíkich kanunam
 enkempramiaji. Nu kanusha Arijiántrianmaya
 yaunchu tau menaintiú nantu yumi yútakui nui
 pujumiayi. Nú kanu nujiin numi-yus najankamu
 jímíar ekemiarmiayi, ni náarin̄kia Kástur tura
 Púruks. ¹² Iisha nui enkemprar weri Serakúsa
 péprunam jeamiaji. Nui menaintiú tsawant
 pujusarmiaji. ¹³ Tura jíinkir nuyanka nayaantsa
 ayamach weri Ríjiu péprunam jeamiaji. Nui
 kanarmiaji. Tura kashin anariā nase suut
 umpuuntí támiayi. Tuma asamtai nú kashinkia
 Putiuri péprunam jeamiaji. ¹⁴ Nui jeawakrin
 Yus-shuar pujuarmia nu, ni jeen juramkimiaji.
 Tuma asamtai nuin̄ chikichkí tumin̄ pujusmiaji.
 Tura nuyanka nunkan̄ Rúmanmaani wémiaji.
¹⁵ Tura Rúmanmaya Yus-shuar, ii jeatniurin̄ neka
 ásar jintiá in̄kiunmaktai tusar winiarmiayi.
 Chíkichkia Apiu pepru támanum táarmiayi, tura
 chíkichkia, Menaintiu Jeā tutainium táarmiayi.

Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmaya uunt kapitiánin ejetimiayi. Túrasha, Pápruka jea ikiamas niisháa pujustí, tiarmiayi. Tura Páprun íísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nan̄kaamasmatai Pápruka Rúmanmaya Israer-aentsu pen̄kerin untuk ikiaan̄ak “Yatsurtiram antuktarum, Wisha Israer-áentsun yajauchin pen̄ké túrachmiajai. Tura ii uuntri akupkarmia nunasha yajauch chicharkachmiajai. Tuma ain̄ Jerusarénn̄um winia achirkar Rúmanmaya áentsnum surutkarmiayi. ¹⁸ Tura nu aencha winia anintsar, akupkatai, turutiarmiayi, wisha pen̄ké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarin kapitiánin ujaktinian táchaitjai. ²⁰ Tuma asamtai, yatsurtirmin, atumin untukjarme chichastaj tusan. Yusa anaikiamuri, Israer-shuarti náakajnia nu táwiti wí tu étserkui, jui achikiar jin̄kiámu pujajai” tímiayi Papru.

²¹ Tutai niisha tiarmiayi “Isha Jutía nun̄kanmaya aentsti, ame yajauch túramu papí pen̄ké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji. ²² Túrasha ashí nun̄kanam yamaram chichaman jintinian yajauch chicharainiawai tama antukji.

Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantai iruntrami tiarmia nú tsawant jeamtai, ti untsuri aents Papru pujamunam iruntrarmiayi. Papru jintintiainiak Muisais yaunchu aar akupkamia nujai tura chíkich Yúsnan etserniu aarmarijiaisha, Jesus nekas Yusa Anaikiamurinti tusa paant jintintiwarmiayi. Nuna tura káshik nankaama Yus akupeamunam pachiinkiatniun étse-étserkua kjarai iniaisamiayi.

²⁴ Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiayi.

²⁵ Chikichkí enentaikⁱ enentáimsatin atsá asamtai, jiinki weartasa pujuarmiayi. Túmainiakui Papru chichaak “Nékasen Yusa Wakaní yaunchu Yúsnan etserniu, Isayas naartin áarmarijiai ii úuntrin chicharuk juna tímiayi:

²⁶ “Ame weme au aents ju titia:

“Ántutka ántakrumsha nekaashtatrume,
Íitkia iyakrumsha wáinkiashtatrume.

²⁷ Warí, au shuara enentái katsuarai;
Kuishijiai ántaksha ántichua núnin áiniawai,
Jiisha epetkamua áanin áiniawai,
Iyaksha wáinkiaiñ tusa, ántaksha antukaiñ tusa
Enentáimkiusha nekaawain tusa,
Winí uwemprain tusa, tura Winí tsuamarain tusa
túrunayi”.

Nuní áarmaiti. ²⁸ Tuma asamtai, nekaatarum. Yamaikia Yusai uwempratin ana nuna Israer-shuarsha susamuiti. Tura ninkia nekas umikiar-tatui” tímiayi. ²⁹ Tura Papru nuna ti iniaisam-

tai Israer-shuar nuamtak núkap chicharnaiyasua wearmiayi.

³⁰ Tura Pápruka nuin jea ikiamsamunam jimi-ará uwí pujusmiayi. Tura ashí aents nin iyutaj tusa wearmia nuna ni jeen itiaamiayi. ³¹ Tuma asamtai Papru arantutsuk urukuk Yus akupea-munam ati, Uunt Jesukrístu túramurincha ashí etserkamiayi. Nútiksan etserkatniuncha Páprun penké suritkiacharmiayi.

Yus Papi: Shuarjaj Yus Yamaram Chicham Najanamu

New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb10d1f0-e2d5-5d8e-8a74-10846708c857